

牧令書卷十五

保息目錄

養民

朱澤澗

吏難一

張惠言

吏難二

張惠言

飭吏正俗四約

陶元淳

圖民錄

袁守定

居官格言

熊宏備

手札節要

陳宏謀

郵民

汪輝祖

蜀僚問答

劉衡

再行勸諭農民節儉蓋藏以充民用事

田文鏡

語陳修撰

潘諮

養民

吳榮光

圖民錄

袁守定

論賑貸諸法

陸世儀

留養局

黃可潤

普濟堂並育嬰堂條約

栗毓美

作吏要言

葉鎮

育嬰堂條規事宜冊

陳宏謀

陝西育嬰堂條規

崇綸

作吏管見

朱

作吏要言

葉鎮

掩骼會事宜冊

陳宏謀

埋鬻掩骼

王士俊

牧令書卷十六

教化目錄

學校

王士俊

廣化誨

陳宏謀

手札節要

陳宏謀

作吏要言

葉鎮

答萬言問

許三禮

講約十則之一

與所屬牧令書二

程含章

廣教化

王鳳生

教法

王植

三省邊防備覽策略

嚴如煜

律例須知弁言

葉世倬

圖民錄

袁守定

教民

汪輝祖

未信編

潘杓燦

作吏管見

朱

作吏要言

葉鎮

勸戒

王士俊

民禮

王士俊

作吏管見

朱

作吏要言註

朱

一得偶談

王有孚

告諭

汪輝祖

居官格言

熊宏備

圖民錄

袁守定

嚴禁迎神賽會以正風俗事

田文鏡

禁敝俗

黃可潤

勸戒

黃可潤

敝俗

王植

求才

陸世儀

教士

黃可潤

紳士

王植

治士子干訟

汪輝祖

紳士

王鳳生

紳士

何耿繩

作吏要言

葉鎮

通查義學租田館舍櫟

陳宏謀

義學規條四則

陳宏謀

義學規條

栗毓美

義學條款四則之一

倪珩

考試點名除弊法

徐文弼

牧令書卷十五保息

安肅徐 棟致初輯

常變交濟斯緩急有須養民之政不亦全乎然有貫注乎常與變而爲政之所不可緩者周禮之保息是也能保息然後能養民矣

朱澤濤 見賦役

養民

天下有其人至賤其力足以有爲散之不見其多聚之足以爲亂者閒民也古之閒民十之一今之閒民十之六通都大邑之閒民十之三窮荒州縣之閒民十之六有無田之閒民有無業之閒民

有有田而無田有業而無業之閒民夫民何可以閒知其爲閒民而不處之使自力幾何而不爲亂也自井田毀限田之制累朝不能行非通都大邑財貨聚積之所則取財之途不廣謀生之術無所施周禮九職曰閒民無常職轉移職事閭師凡無職者出夫布孟子曰廛無夫里之布廛之設也所以處閒民夫布之罰也所以驅閒民使業廛三代聖王位閒民有地教閒民有法閒民之多寡有無上皆知其數而措置之今則督撫不問郡守不問州縣不問豐歲優游坐食一遇凶荒相聚爲非何所不至夫吏之於民州縣爲親近日州縣之吏司錢穀之出入而已百姓多寡虛實之數不知也司催科之緩急而已百姓流離生死之故不知也災祲猝至

閒民嗷嗷仰望官粟給之不足於用不給展轉溝壑擊自傷心一歲饑則爲盜再歲三歲饑則爲寇一郡饑則流離就食一二省饑則寇盜之變有不可言者呂祖謙曰上者修先王預備之政其次修李悝之政不修預備而講求於臨時未見其有濟先王預備之政自井田毀數千年不復呂氏猶以此爲上者貴得其意耳詩曰嗟嗟保介維莫之春亦又何求如何新畬月令曰王命布農事命田舍東郊修封疆審端徑術善相邱陵阪險原隰土地所宜五穀所殖以教道民必躬親之農乃不惑古者設農官親行田畝教誨農事至再至三非故事也王制曰土無故不殺犬豕麋人無故不食珍庶羞不踰牲又曰九年耕必有三年之食月令曰命有司趨

民收歛務蓄棊多積聚古者有司教民蓄積食時用禮諄諄懇懇非故事也三代聖王養民之制縱不能復猶得於載籍中推求其懷保無已之意今並其意而亡之矣既亡其意卽日修補救之政欲民不閒游坐困豈可得哉夫預備之政不復徒存此區區之意烏足以濟而不知其非也今日州縣之吏所漠然無有者此意耳責今日州縣之吏使顛連無告之民代種富民之田定之以令不行也隨之以罰不行也設又使顛連無告之民日習百工之業教之不勝教也督之不勝督也所望於州縣之吏者惟此意也今之爲吏者有能致意於溝之洫之耕之耨之者乎有能致意於食之用之節之積之者乎有其意而行之不善於民無益也亡其意而

覩然處於民上將焉用之一邑之勢養無田無業之閒民難養有田有業之閒民易養閒民於災荒之日難養閒民於豐亨之日易邑有里里有鄉鄉有圖圖有老一圖也有田有業者幾家有田不耕有業不勤者幾家無田無業傭工操作者幾家老預教之官親行之教之以耕耨教之以攻業教之以濬畝澮教之以遠服賈教之以量食教之以節儉教之以多蓄積民自爲積先王預備之政也官之教之不以爲民之事而以爲己之事民之奉行不以爲官之事而以爲己之事官之意入乎民民之意體乎官有田有業之民有所餘無田無業之民有所賴而又有常平社倉義倉之積以備不時之用此在吏之善爲之也嗚呼其亦難矣漢唐以來養民

之政陵夷墮壞無一存者循吏如龔遂朱邑輩傳其人不傳其政非政之不傳一人之政而非一代之政宜其不傳也當此政敝壞民游佚之時望有循吏其人者因意以立政立政以養民豈不難乎幸有其人所用非所長所長非所用加之時勢之倥傯賠補之逋累大吏之阻撓奸宄之讒毀卒不得志以去坐使有田有業之民樂歲終身苦凶年不免於死亡又何問無田無業之民乎此有識者所深憂也

張惠言

見保甲書卷二

吏難一

古之吏難乎今之吏難乎古者民食君之食而衣君之衣服君

教而事君之事生齒以往至於老死皆有以給之人民車輦馬牛
六畜皆得以數計故其民有貧富而無凍餒而其爲州黨之吏者
其始皆與其民輩作輩學其德行道藝爲衆所興也而還以長其
鄉里故衆服以聽其所治上者五百家降是乃百家以下至五家
而止其人習故不察而悉其事簡故不勞而詳當其時吏奉法守
條教而天下治後世之吏則不然出五百里乃聽仕宦南人使之
治北山人使之治澤其土俗固非素悉也州縣大者數百里小者
乃百里戶口以萬計簿書案牘出入之擾强者弗能勝也送迎之
煩供億之禮舟車厨傳之費廉者勿能節也民富者貧者安居者
轉徙而流亡者吏不肖不知其何以然也賢者知之矣然而不可

如何何則耕無以爲之田賈無以爲之費居無以爲之宅稟而粟之則無以食之殖而抑之則亂故不得不聽其貧而轉徙以至於流亡不幸而有盜賊水旱之患雖貰其租寬其賦日賑而月貸之民之死生固不可知也幸而水旱不告盜賊不發租稅以時入徭役以期辦上下相慶以爲太平而顛窮之民父賣其子夫鬻其妻爲臧獲奴婢以自存者吏不得而知也饑寒之不忍起而爲竊盜矯虔無行以入於刑僂枕首死者吏不得而知也失業無告橐項以死填委於溝洫者吏不得而知也然則吏無虐無墨無失法而民之死者已不可勝數矣嗚呼今之吏而欲古之治其亦難矣夫民賴上之力以生其生以長其子孫自食其力之所出而以其餘

奉上以相養故尊其君而親其長無事則長安有事則可用今也
民自以其力養生營死以幸脫饑寒死亡之患而未可必得而又
損其所以自養者以給君長奉期約吏有求焉號囂而令之帖帖
若奴隸錙銖而筭之充充若外府然而有以窮困告者庸吏作色
賢吏感鬪卒莫起而爲之籌若是求民戴其上不可得也愚以爲
方今之患獨患吏與民濶而不相親民之視吏也憚然若神鬼之
不可卽吏之視民也芸然若履崇山而視原隰之草木無所別之
民之疾痛顛連而瀕於死者有執途人而哀之者矣未有號呼求
拯於州縣者也其愚者不知州縣之職之宜生我也其知者知號
呼之無益也且不唯無益而已州縣出一令行一法傳呼者數十

人奔走者數百人利未見而已受其害故賢士大夫多以爲戒而民亦願相與休息而無爲夫立法而不便者上不悉下也法便而民不勸者下不信上也今夫良將領百萬之衆雖竈下廝養莫不知其所爲而士卒亦莫不與其將同腹心并耳目者非能日偵伺而人撫循也審于其利達于其害法度明而誠信著也故苟有以相親則百萬之衆措之若指臂苟無以相親則內治一妾外馭一僕且不足審其旦暮所事而何以謀長乎里有正圖有保是古之闔閭鄰長也宜擇士人有行者爲之誠能略仿周官管子之意立之教法使各掌其治以時課而問焉暇則與之論利害省誦俗闕闔幽隱之故必可知也令有謀焉則修之鄉鄰以修之都都以修

之圖千里之遠可使猶一家也上有以知其下故舉而不過下有以信其上故令而不悞然則生民之政舉而措之可也

吏難二

夫吏誠有以信於下而有志於生其民則必無狃於目前且夕之安而務治其原本今夫古之所謂休息無爲者不爲矯絕之法不立詭俗之制不拂乎民心以求譽如此而已非謂泛泛焉任其自生自死自榮自悴於其下而我不與知乃曰上與民不相擾也若夫管子之治齊子產之治鄭孟子之治滕矯然一變其故綱立紀具朞月之間犁然也故三子之治可謂究其本矣非之而不懼沮之而不撓及其經制既定上下晏然子孫蒙業數十百年可以無

壞然則休息無爲未有大於此者也今之賢吏曰寬徭役謹賦稅去其盜賊理其獄訟民安而治得是則然矣然而其所及者樂業之民也若其失業者雖有寬徭恤役之令而彼無與也饑寒之不一恤則所謂盜賊者皆此人矣吏見其盜賊也而以爲不足惜嗚呼孰知其始之本非盜賊耶而況有不肯爲盜賊而死者耶天下之地皆足以衣食天下之民而利之所出不均故得其源者生而失其源者死且夫一人之利二人資之則微十人之利百人資之則匱今民之所以求利者一人得之則千人趨之然則利安得不絀而民安得不貧是故欲民之無饑寒莫若均利源欲利源之均莫若正民業管子曰聖王定民之居成民之事四民者勿使雜處故

教有恒而事有攷蓋古者度地居民而頒執事其要如此今計一縣之中田上下之率給幾何人山澤所出給幾何人四方貨賄市井之贏息所食者幾何人謠俗所資技藝工匠之巧須幾人地饒瘠之可化者幾何草木水石之未取者幾何四圻之內都會者何所鄉里市肆之不當其所者幾何行資四方而不棄其鄉里者幾何人通游者何所利矣總其數而乘除之必使所業與利相當而濟其有餘不足其農之能盡地力者工之能立物利者商之能裕本計者所在以告吏發幣聘之建以爲師使長其曹輩而教其不及稽其怠惰者不任者斥之農聚於疆工聚於肆賈聚於市田而不能播耰者不容於疆藝而不能飭材者不容於肆貿遷而不能

阜通者不容於市其無田而無資者使相假貸而時其出入男年十六而不業農女年十三而不治絲枲者罰其父母則民勸其業而利修其有饑寒者或寡矣或曰管子之法四民各處其所今民之雜處久矣亦將分之乎否乎曰夫分民者非奪其居而徙其鄉也百室之聚必有市有肆有民居之屋其爲賈者必就市而工者必就肆其常也吾因其宜而安集之使不至哢雜而已何難焉曰民旣習其業矣利不足又使其他習如之何曰非徙已習之業也禁其方欲習者而已夫習焉而不獲其利苟願有徙者吾有以安之而又有以教之則彼亦樂得其所矣今夫一家之中有操作者有廝役者有芻圉者其爲之者皆其人之所自欲也而分處其所

爲者則主伯之事也今一邑之民爲士者爲農若工賈者問吏以
其數則茫然而不知也嗚呼僕隸無經事而主伯且得有其家者
哉

陶元淳

字子師江蘇常熟人康熙戊辰
進士官昌化縣知縣有南崖集

飭吏正俗四約

自受命以來隨遇諮訪深知茲土之民墜於塗炭頃入縣境所過
田疇蕪穢村落邱墟竟日行榛莽間不見一人旣抵縣治則城垣
頽敝學校廢弛士無絃誦之聲家鮮餅壘之積物產蕭條商賈不
至較其疾苦殆百所聞知縣惻焉心傷思欲救其彫敝而未知所
從爾父兄子弟生長此邦凡所以致此之故必知之深矣其悉心

條陳利何以興害何以去務鑿鑿言之使下不病民而上亦不至病國此則知縣之所深期於爾者也知縣筮仕日淺材薄力絀四境中有通曉世務諳練事情者不拘何色目人卽列其名以報爾曹生長邊海向來民牧未有以禮教先之其自安樸陋宜也今欲變易風俗當自我左右之人始有仍褻服徒跣不衣不襪囚垢入公門者必重加懲治夫法紀尊嚴之地固不容此倨侮之風矣爾其知之勿慢

陰陽之氣不相凌內外之職不相紊故男耕而女織人倫之制玉化之基也今爾民晝居於內而使其婦沾體塗足力作於外易陰陽之位亂男女之別傷化薄俗莫甚於此且非所以勸勤也夫一

夫不耕必受其饑况通邑之民皆怠棄職業乎今與爾民約男子
治外女子治內不得復循固陋自致饑寒卽日天氣稍涼知縣當
身行田野親察勤惰先爲布告如左凡我諸生父老通曉文義者
宣明我意家喻戶曉毋復爲此蚩蚩矣

爾民生長茲土一旦飄然遠適必有大不堪於中者非天災之所
迫卽橫歛之所加雖欲須臾少留而勢不可得其去此之彼宜也
今知縣下車之始諮訪向日舊例可裁者卽裁可減者卽減欲休
養斯民凡我父兄弟孰無廬井鄉土之依孰無祖宗墳墓之戀
孰無姻戚故舊之歡而乃轉徙外地失業流離生爲旅人死爲客
鬼汝等自顧何以堪此今汝等田業尙在但能幡然來歸卽具名

報縣量免差役其有貧窮下戶實在無力者當量給牛種決不復令失所汝宜鑒我之誠勿復淹留彼中也

袁守定

見治原

圖民錄

凡莅一方當相其所少亟爲補之俾民有所利賴任延爲九真太守俗以射獵爲業不知牛耕民常告糴交趾每致困乏延乃令鑄作田器教之墾闢田疇歲歲開廣百姓充給韋丹爲江南西道觀察使民不知爲瓦屋草茨竹椽地多火災丹召工教爲陶人能爲屋者受瓦於官度其費不取贏利火患遂息崔寶爲五原太守五原土宜麻枲而俗不知織績民冬月無衣積細草卧其中見更則

衣草而出實至官斥賣儲峙爲作紡績練縵之具以教之民得免
寒苦劉善明爲海陵太守境邊海無樹木善明課民種榆檟雜菓
遂獲其利數事皆善補地方之所不足爲利溥矣

善補地方之所不足

書言如保赤子保字最可味民本不能自立須我保之也詩言宜
民宜人宜字最可味民則猶是須我宜之也孟子言保民直可王
天下安在彈丸之邑不能理乎詩言宜民受祿于天安在升斗之
糶不克保乎

保民宜民

朱恭簡英嘗曰每爲民得省一錢還室神氣頓爽幸生 聖世無
政不舉無大利可興祇爲民得省一錢則民受一錢之利如收條
漕則徹底洗刷撙省耗餘理訟獄則迅速審結以杜妄費胥吏有

禁毋使褻賊菜蔬之需不致短價在官無取辦之物料里中絕票差之追呼時時以此存心自然觸處有益此今日牧民者第一務也

爲民省錢

票差當慎凡一票往鄉百里必有所費諺所謂官一點硃民一點血也余所歷州縣每書吏呈票簽押輒握管躊躇不能下十格其八九嘗循歲例於河神廟演戲票徵造臺者甚夥余曰一臺之微動擾木席紬布夫匠等至十餘行之多豈神之所樂乎一保長請曰河神廟之東爲某廟舊有臺於彼演戲請河神就觀可也余答曰善爲民惜力神所與也其後遂以爲例

慎票差

熊宏備

見治原

居官格言

請端請賑姑了目前之事不知汰一苛吏革一弊法痛裁冗費務
省虛文乃永遠便民之事

陳宏謀

見保甲書卷三

手札節要

一切靡文陋制無裨于公而有累于民者及官有些須之益而民
受無窮之累者次第清釐去其太甚爲百姓省一分擾累卽爲百
姓培養一分元氣

寄顧

鴻書

緝土刁玩惟宜開誠布公漸次整頓常有同一勸懲而稍有意見
則未免過激流於己甚非保全之善策也

寄初元方書

凡地方有富厚之家乃無業貧民所賴以衣食者也遇有訟事是非一准于理如鑑之空如衡之平乃能服民亦足杜奸俗吏因富避嫌或推富以袒貧均屬偏見最長刁風要知安富正所以恤貧也

寄書

涵書

汪輝祖 見保甲書卷三

卹民

爲吏者但知責民試思身爲法吏果能時時畏法事事奉法乎貪
隨者無論卽謹慎自持終不能於廉俸之外一介不取如所云陋
規何者不平 國法特宿弊因仍民與官習法所不及相率倖免
耳官不能自閑於法而必繩民以法能無媿歎故遇愚民犯法但

能反身自問自然歸於平恕法所不容姑脫者原不宜曲法以長奸情尙可以從寬者總不妨原情而畧法

先儒有言一命之士苟留心於愛物於物必有所濟身爲牧令尤當時存此念設遇地方公事不得不資於民力若不嚴察吏役或又從而假公濟私擾累何堪故欲資民力必先爲民惜力不惟弭怨亦可問心

地產土宜非守土官之利也偶因取給之便奉上官贈寮友後遂沿爲故事甚至市以官價重累部民毒流無旣如之何爲此厲階也故舊規所有尙宜斟酌裁減若所產之物素未著名斷不可輕用饋遺貽後人之害禍同作俑

境當孔道酬酢殷繁器用食物間有官價之名或取自鋪戶或供
自保役非攤派卽墊賠原非善政然陋習相仍概予裁革轉恐事
多棘手此宜量爲節制可已則已萬勿任見小幕客漁利家人借
端市索致民力不堪激而上控

藏富於民非專爲民計也水旱戎役非財不可長民者保富有素
遇需財之時懇惻勸諭雖慥者亦感奮急公而事無不濟且富人
者貧人之所仰給邑有富戶凡自食其力者皆可藉以資生至富
者貧而貧者益無以爲養適有公事必多梗治之患故保富是爲
治要道况邑境之無賴專好擾富人以逞其慾保富之道惟在嚴
治誣擾使無賴不敢藉端生事富人可以安分無事而四境不治

未之有也

劉衡

見保甲書卷二

蜀僚問答

或問圖治以何爲先曰天下之患在民貧民貧無以爲生則輕犯法吾儒身列仕籍有牧民之責道在恤民貧而已能恤民貧使無犯法則治矣

或問何以恤貧民曰但謹握周禮保富二字而已蓋富民者地方之元氣也邑有富民則貧民資以爲生富民多便省却官長恤貧一半心力故保富所以恤貧也

或問何以保富曰但力圖興利除弊而已蓋興利則富者益富除

弊則富者不貧故皆爲保富要務也顧興利未易言我輩所可勉自主張者其惟除弊乎

或問除弊以何爲先曰禁制棍蠹誣擾良民而已蓋富民多羸弱畏吏役如虎狼棍蠹等窺其底裏相與勾結視爲魚肉甚則潛串官之門丁誣陷恐嚇以取其財而破其家此弊所在皆有賴司牧者有以除其弊而保之也

田文鏡

見用人

再行勸諭農民節儉蓋藏以充民用事

查民間用財大則納官糧以免追呼之擾次則留餘粟以備終歲之需此外或置產買牛明年當倍而入或娶婦嫁女凡事循分而

行或布帛所必需但求溫煖或葦絮所不免毋事奢侈卽報賽田功而鷄酒豚蹄更多誠意當歲時伏臘而汗罇杯飲饒有淳風若因歲入之旣豐便爾用財之無度或赴會場而羣相賭博或進酒館而共快醞酌或恃其有餘與人爭訟或只圖適意不念將來則日用不保其常充青黃必至於不接諺云常將有日思無日不可無時想有時雖屬鄙語可爲格言合再勸諭爲此示仰撫屬官民人等知悉將本都院此示不得視爲官府具文惟率作父兄告誡時時寓目刻刻經心而財有不常積用有不常舒者必無是也有父母斯民之責者其轉告之有木鐸警世之心者其提撕之有好樂無荒之思者其諦聽之毋忽

潘 詒 見屏惡

語陳修撰

凡地方奢華中人家最難處須以禮法節其財用使地方不貧然奸人遊食必衆不可使遽無所容治其劇者令各有所事蓋地方繁劇百務所會去其過以補不足易爲措置至地方極儉樸處必安居貧約與古最近而施予必嗇其一二極貧苦人竟無從覓一絲一粒偷盜犯法亦不可不預思安頓之術

吳榮光

見農桑下

養民

養民之政其端甚多有戶口籍貫以奠其居有編甲防盜以禦其

侮有勸農開墾修隄以課其業有田穀之禁以去其耗有捕蝗伐
蛟以除其害有橋梁濟渡以利其行有倉儲以備於未荒之先有
荒政以救於既荒之後有惠卹諸政以周困窮而登仁壽此皆會
典所載垂爲治要者也至於築塘堰以資水利備器具以救火災
寒則施衣饑則設粥渴則置茶病則給以醫藥死則給以棺衾葬
則給以義地皆政之切於民生者然此舉多由好義紳衿共爲施
濟會典不及備載地方官司宜急加勸勵以裨化原

袁守定

見治原

圖民錄

舜稱堯曰不虐無告武王稱文王曰不敢侮鰥寡周公稱祖甲亦

曰不敢侮鰥寡稱聖人之德而必言其不侮鰥寡無告之民者蓋此等窮民人情所易忽於人所易忽者而致敬焉乃爲盛德之至不虐無告

五帝之世矜寡孤獨廢疾者皆有所養文王發政施仁必先四民之無告者王制凡瘠齔跛躄侏儒斷者各以所能仰食於官官一方者於政成民信之後善爲措置擇方正矜者經理其事多置田畝歲收其租以爲常廩堂宇傾者葺之廢者興之孜孜奉行國冢之制以行己意其爲益也必多矣

餘食老疾無告之民

陸世儀

見保甲書卷三

論賑貸諸法

詩云嗇矣富人哀此梵獨古人發政施仁必先斲獨 朝廷體古
人之意設孤老院給孤老糧以養梵獨德可謂至矣歲久法弛縣
官漫不經意孤老院坍塌廢殆盡孤老糧爲富家乞作存留梵獨之
被惠者十無其一豈不重負 朝廷德意愚謂爲縣官者始蒞任
時當卽以此事爲急身臨其地親爲經理凡院屋宜編號稍加寬
敞井厠畢具四等窮民中惟寡婦宜獨居一處其餘三等當各因
其所親熟束以伍法使之老稚相依龔轡相濟送死養生互爲倚
賴是亦處梵獨之法

佛教無補於天下而獨有益于梵獨是不妨因勢利導凡孤老院
中縣官宜擇僧徒之有行者使居其處許之募化俾朝夕看養梵

獨有功則縣官勞之其斃獨之人願爲僧者亦聽蓋垂死之人其
心別無所樂使其注念西方亦可消遣餘生解其愁苦今僧徒中
徃徃建放生菴開放生池畜養雞魚豕畜而獨無有念及斃獨者
真可異也

黃可潤

見保甲書卷三

留養局

直隸留養局創於制府方公總藩時以養天寒道路疾病或衰老
不能行者每歲十一月起至正月盡止實力爲之與否則存乎其
人制府常謂余曰交河令尹侃在肅甯時於貧民甚留意邑有貧
民或勸諭其親屬撫卹或官爲設法收養邑當被災後絕少顛連

道路之人尹與余曾同辦差人似迂謹而存心如此旋擢州牧令
乃保舉知府循吏未嘗不見知也余在大城設留養局共六處自
捐勸捐中有四處係太布鎮以矜監誠實者司其事鹽當舖收錢
米鄉保于朔望具報而親察核之乾隆十六年二月核共養二百
餘人久暫不等中分男女二局每日人米一升錢五文慮鄉無醫
每局自捐寸金丹百十九醫方集驗一本以備急需除醫藥棺斂
及去者給盤費外計用錢五十千零米四十百零存床椅鍋甌之
屬留再用尙存銀一百六十兩余再捐銀四十兩共二百兩交當
鋪生息每年計得息四十八兩可備下年之用又大城陋例每歲
迎春舊有彩棚臺閣係鹽典商承辦後商人折價典商二十四兩

鹽商十六兩輸公發辦余謂此無名之費徒飽胥役之橐拒之又不足以明惠乃令鹽商將每年十六兩充入養局合前共六十四兩不足再行量捐典商卽令折交舊棉被十件棉衣一百件養局備用經通詳立案入於交代案內常年嚴雪道殣歲二十餘人或十餘人設局後是年五六人耳此事經制府核實通飭各屬然在得人常親到自不虛應故事也

栗毓美

見保甲書卷三

普濟堂並育嬰堂條約

一查辦宜覈實也收養貧民有普濟堂政先堂體仁堂廣仁堂養濟院留養局名目不一總爲收養鰥寡孤獨廢疾貧民而設凡

收養之初必將籍貫住址年貌及殘廢篤疾先由地方官捐刷呈式逐細註明親身點驗如果與所開相符卽詳冊給與腰牌准其收養入院不得任聽書役代報捏稟以杜冒濫非意存苛刻緣少一名浮冒卽多一名實惠全在地方官實力奉行慎勿始勤終怠

一額數宜增廣也州縣收養孤貧准於地丁內報銷者每處不過數名及數十名不等此外或有官地官房收租或贖金交商生息經費有限而額數亦拘徃徃有因現在孤貧業已額足其陸續呈報者或因無項可支候缺挨補有候至數年而不得一缺者枵腹以待未免向隅應查明收養在堂者實有若干名報明

未入堂者尙有若干名酌量增廣二三十名至八九十名均無不可在州縣每歲捐費不過數十金及百數餘金而窮民受惠實多若再能籌款生息以垂永久則受惠之日更長矣

一口糧宜親身散放也凡散放口糧各州縣有在初旬者有在下旬者須示以定期令貧民等齊集親領地方官親身赴堂點名發給如遇公出卽移委典史教官前往散放不得任令胥役及堂頭代領致滋弊端至老年殘廢或距城稍遠不能親到者亦可查驗腰牌准人代領但須查問明確以杜捏冒乾沒之弊

一捐給棉衣宜認真也各堂貧民隆冬皆散棉衣然徃徃委之胥吏託諸罔利之裁縫棉花則易新而舊減厚而薄甚至以敝衣

充數禦寒何資不若於冬初散放口糧之時當堂查問情願自行裁做者每名發給大布一疋棉花一觔不能自做者官爲製造務派誠實家丁認真稽查花須足觔布須足尺不得稍有剋扣

一器具宜周備也楚省鄖陽一帶居民近山者間有煖坑其餘或用木床或用地鋪各隨地方風氣而收養窮民木牀易於損壞應於修理院房時卽在屋內門窻之下兩面靠牆用磚修砌圍坑高一尺五寸寬三尺屋大者可住三人小者可住一二人貧民入院之初每人給草簞一個或用稻草或用穀草另給麥稽一大捆蓆一領鋪設旣厚則寒濕之氣不侵再各給粗碗一個

砂鍋一個粗瓦盆一個冬月屋門用草簾遮掛窻櫺用厚紙裱糊以禦冽風此外如棹橙之類量爲置備各隨地方情形變通辦理並將所有器具造具清冊兩本一本存案一本交管堂人照料以憑隨時稽查如有盜賣毀壞情事地方官查明責令賠補至堂內尤宜灑掃潔淨不得聽管堂人等作踐躑躅院中須廣栽果木並楊柳樹株數年之後夏日既可乘陰避暑秋冬取材落實兼可添補柴薪

一男女宜分院也收養貧民男女切忌混雜如舊有堂院僅止一宅宜按計房間相度形勢應於何處立牆或分左右或分前後異院出入以別嫌疑而免混雜若本係夫婦宜另隔小院酌撥

開房同室而居俾資團聚

一堂內宜整肅也向來普濟各堂院均有管門及孤貧頭堂頭等名目此種人役原爲經管堂務照料貧民而設徃徃有勾通書役捏名影射及勒索進堂使費尅扣廩糧凌弱侮老等情地方官須隨時體訪嚴行懲治以肅堂規

一育嬰堂宜並建也查卹孤保赤仁政所先不得因民間現無棄兒溺女之事並育嬰堂而遽廢之嗣後有堂者務須實力奉行無堂者亦卽籌款興建或先於普濟等堂女院內另撥閒房通融試辦如有將兒女送入堂內並呈報有遺棄者卽覓雇奶婦乳哺仍准其隨帶自生子女每月給工食錢二千文歲給帛布

二疋夏布二疋隆冬加賞棉衣棉被以禦寒至嬰兒三歲後能食米飯先儘本身父母領回如父母已故奶婦仍願撫養者聽其自便如不願撫養查有親屬可依靠者呈明地方官責令撫養倘親屬貧難兼顧仍照孤貧之例支給口糧棉衣地方官不時存恤如並無親屬而民間有艱於子嗣願領爲義子並領女孩爲媳者由地方官確查實係良民准其承領取具地隣甘結存案以杜轉賣爲婢爲奴之弊如該地方實無遺棄嬰孩此項經費卽作爲收養貧婦之需擴充普濟等堂之所不足

一疾病宜醫治也貧民衣食不給寒暑不時易生疾病地方官應隨時查察如有感時疾患瘡瘍者卽責成官醫生調治務痊優

加資賚若時疫流行將患病貧民另置一院以免傳染
一施棺宜從厚也貧民孤苦零丁死亡誰問應飭管堂人隨時呈
報地方官查無別情卽捐給棺木在於義地埋葬毋許淺埋暴
露向來收養貧民皆有發給棺木錢文但恐虛應故事或堂頭
從中短扣全在地方官嚴切稽查庶免有名無實

一義地宜添置也各州縣皆置有義地爲貧民埋殯之所然歷年
既久則葬無隙地而堂頭地保草率了事因埋新棺遂棄舊骨
以致屍骸暴露且有不肯深挖旋埋旋發者查掩骼埋胔仁政
所先凡城鄉暴骨露棺均應妥爲收瘞不獨在堂收養之孤貧
也地方官亟爲添置義地仍派誠實官親周歷查勘

一流民宜遞送回籍也各州縣於普濟等堂之外另立留養局者原爲外來流民而設查此種流民固有游手好閒不務正業窮無所歸亦有因投親不遇或中途患病一時旅費無措流落異鄉者此等人最遠者不過千餘里數百里不等每日所需路費不過五六十文地方官應隨時查察按其道里之遠近一併捐發路費仍備文沿途遞送酌給口糧在流民既可生還故土不致流爲乞丐轉爲盜賊亦綏靖地方之一端也

一籌備經費修葺房間須通詳立案也各州縣收養貧民旣已盡心區畫所有經費如置產收租流弊尙少惟交商生息一項間有地方官私自提用日久漸致侵虧應將生息銀兩曉諭各商

給以印照不得任聽官吏通挪私相授受違者著賠其房間應隨時補修不得任其坍塌每歲年終將經費若干兩院房若干間申報一次以備查核如能添籌經費廣設院房隨地隨時擴充辦理是地方官以不忍人之心實力奉行則生全者衆慎勿視爲具文而忽之也

葉

鎮

見治原

作吏要言

人皆知恤孤老而不知孤幼更屬堪憐荒亭廢廟虎豹蛇蝎莫知趨避爲上者宜四處訪查勸親屬領回撫養如無親屬或收養公所俟稍長可以營生遣之去庶盡父母斯民之道

弱女不但傷風害理凡姦拐賣休賈休及窮民終身不得一婦盡
根于此女少男多流惡種種能爲立法禁革所關世道人心不小
須竭誠痛切告誡每經一處卽停輿聚父老子弟環聽之其欲歌
欲泣情狀自躍躍不能已又設廣生簿首列示語給保正遍諭挨
查遇生女者登記月日姓名月朔繳核貧不得贖者捐給錢米小
衣令其暫時存養以俟人之抱養爲女爲媳公便按簿抽查犯者
以法繩之並坐保隣二三年間積習自革卽地方遼濶耳目難周
宜建育嬰堂收養要之民各具天良惟在上者以誠動之况事關
天性尤易感格而又立法以隨其後不悞者亦希矣

陳宏謀

見保甲書卷三

育嬰堂條規事宜冊

一堂內設立堂長司事也查育嬰堂從前原設有堂長係廩生曹漢經管看視嬰兒稽查假冒并監散乳媪工食該生實心好善井井有條毫無弊混實於善果有益自該生故後未經設立以致有名無實堂事廢弛銀米冒銷今應仍設堂長一人令府縣慎選品行端方老成好善家道殷實之士毋論貢監生員許紳矜公舉報明入堂地方官優以禮貌每月給以紙筆銀一兩照例經管稽查監放該堂長管理三年如果實心料理該府縣井經管官具詳本司給與匾額獎勵仍設司事一人專司井協同堂長照管一切事務每月給銀六錢亦令該府縣慎選誠實良

善之人報名充當管理三年實心協辦該府給以花紅匾額示
獎如堂長司事或有怠慢徇私經管官查實卽詳報另換分別
示懲

一乳媪宜詳加選擇也嬰兒之安危全在乳媪之保護凡有願乳
遺嬰者令其夫至堂內報明堂長親至其地相其乳色務擇年
壯有乳之人取兩隣結狀保領文約將姓名居址年庚詳登號
簿俟有遺嬰按冊給養從前乳媪多有住居堂內但房屋無多
且有乳之婦年紀未老旣無夫男同處未必不生他隙應照江
南蘇州規例俱令領嬰歸養堂長每月密察一二次有不得所
者亟易之

一乳媪工食宜核定也查乳媪工食從前每名月給市斗米一斗五升多有吏役侵扣情弊而有米無炊亦屬未安今每名每月酌給京斗米二斗五升銀三錢每月初二日經管官將銀米支送堂內眼同堂長按名散給并卽於是日將嬰兒抱赴堂內驗視是否壯潤潔淨以別勤惰

一嬰之來去宜加稽查也貧民所生之嬰願送堂內收養者不拘何項人抱至堂長驗明具報經管官一面卽將本嬰生庚年月日時是男是女并詢伊父母姓名居址入簿登記給某媪乳育亦卽於冊內註明如有道傍遺棄行路之人抱送入堂者亦查其懷內有無生辰八字登簿記明並設立竹籤上書乳媪姓氏

居址及本嬰生辰年月手足螺瘻疤瘡數目用堂長圖記爲識
領給工食時逐一查驗以杜混冒至於遺棄嬰孩大抵女子居
多稍大卽有人收領若不報名查察不但乳媪仍冒工食且恐
女子失身匪類嗣後嬰兒不必拘定三歲民間如有無子女之
人欲乞養爲子女者預於堂長處說明堂長察其人非下賤家
疋囊殮者報明經管官許其領去好爲收養仍將收領之人姓
名住址年月日期登簿查核并取伊或爲女爲媳不致爲奴作
婢甘結隣佑保結該管官註冊存案其乳媪工食卽行停支將
籤繳銷毋得措索止許承領之人給乳媪扣布一對以爲衣服
之需至僧尼等類來歷不明之人一概不許領養其領女之人

尤須於領結內書寫明白至有將自己子女送堂仍交乳媪冒混工食者查出定將本夫重處

一嬰兒疾病夭殤宜加軫恤也嬰兒遺棄堂中衣服必不能全應春給單衣一件兜肚一個秋給布襖一件并襪裙各一皆新布新絮爲之遇有疾病應需調理查普濟堂現有醫生一名已經給有工食應卽令該醫看視其需用藥餌應令堂長查明若干服每服給銀二分月終於經管官處支領照數給發至嬰兒或有夭殤向來未經議給棺木多致淺葬拋露嗣後如有夭殤者堂長驗明報經管官一歲給錢一百文二歲給錢二百文三歲給錢三百文買備棺木僱工深坑埋葬免致拋露乳媪工食停

支竹籤繳銷

一錢糧宜加清核也堂內收支數目經管官每月造冊申報仍於
年底開造總數清冊申送本司報銷并令堂長將堂內收嬰若
干領去爲嗣若干夭殤若干現存若干乳媪某人第一名自本
年某月日乳媪開支工食起逐名如式開列或領去爲嗣並夭
殤之嬰於某年月日乳媪截支工食逐名如式開除造具清冊
呈送經管官核明繕送本司查考

崇

綸

號荷鄉滿洲正白旗
人現任陝西鹽法道

陝西育嬰堂條規

一 是堂大房三進每進五間第一進大門兩旁四間

住堂役及委
員董事諸人

第二進居中正廳一間南首二間

住委員董事

北首通連二間作爲

官廳廳後南首井堂一厦北首茅房一厦南北房八間

安設厨房茶爐

並厨役人等居住

內堂門裡南北房八所每所三間一連

住乳婦六名嬰孩十二口

僕婦一名

每所房門懸粉牌一面書明乳婦姓氏嬰孩姓名

如有更換者隨

時改

上正屋五間中設

聖母堂三間兩旁耳房各一間

各住首姬

一名乳婦一名嬰孩二口

共住乳婦五十名哺育嬰孩百口內堂南首茅房

七間北首偏房五間

存貯物件並防有嬰兒天花分住者

一是堂事繁人衆防範宜嚴鹽道總理其事

每月到堂稽查一次

清軍廳爲

專管官

每十日到堂稽查一次

再由鹽道委精練老成勤幹佐襍一員

每月

送薪水錢八千

約束衆人照料諸事

願否宿堂聽其自便每日必須親到

每三日同董事

進內堂門逐號巡察功過當時註冊嬰兒安否乳婦優劣首媪公否僕婦勤惰倘所

犯情節較重者回明清軍廳懲辦如發員果能任勞任怨經理

一年由清軍廳查明稟請鹽道移司獎勵

一堂中事務繁瑣由眾鄉紳公舉老成廉潔董事二位每位每月東脩錢五

千每日薪水錢二百文如目下安人難得暫延幕友與委員公辦經理出入銀錢詳細登簿公

同委員按日算明每月結總送清軍廳稽核每年終統共結總

造冊呈鹽道一分清軍廳一分本堂一分存案備查並隨時約

東內外男婦必須常川住宿遇有要事不能常住准其輪流值宿不准推故他往

一堂外看守大門須派老成差役二名由鹽道選派一名清軍廳選派一名每名每日給錢

八十文自行買食稽查出入接遞嬰孩攔阻閑人傳稟事件加有送嬰

來堂卽時報知

委員董事

不准遲悞需索錢文犯者必究

一堂役應擇老成勤練之輩方准投充須僱厨役二名

每名每月工錢一千

五百文不准偷減

火夫二名

每名每月工錢一千文管理燒茶燒火並內轉桶遞送飯菜等件

打掃夫一名

每月工錢一千文兼帶挑水

買辦一名

每月工錢一千文堂內雜差俱當服役均

應遵奉

委員董事

約束毋得擅離悞公如有舞弊滋事

若釀酒賺錢偷物懶惰等

情查實嚴懲逐換決不寬貸

首姬爲衆婦之統屬所係匪輕全憑查察周詳

乳婦有無口角是非乳水是否

充足並小心

秉公任事督率衆婦用心撫養

如嬰兒飽煖饑寒須體貼盡致且防

各房火燭

乳婦貪睡

方能保全嬰命今堂內人多事繁必須擇舉首姬二

覆壓等情

名各分字號以專責成

每名每月月費錢二千文點心錢三百文

如非勤練老成曾

生子女者不准充當至號內什物

如乳婦鋪蓋動用器具每
日飯菜並嬰兒衣服等件應

着令照派管理

准各僱僕婦一名以備
役遣工錢與衆僕婦同

並督責各僕婦清晨洒

掃每處給竹掃帚一把

一換

以期潔淨倘有違悞堂事以及得受乳

婦賄囑隱匿作弊情事有礙嬰孩者定行革退

一僱募乳婦爲嬰兒生死之所寄選擇尤宜慎重凡有投充者或

由官媒婆引薦

先擇老成官媒婆一名着其預先留神如僱乳
婦一名給錢三百文僱僕婦一名給錢一百文

或其夫男及親人挈來俱當報明姓名籍貫住址生業本婦氏

某若干年歲

如在三十上下體壯乳足者爲合式不滿二十者
乳汁縱濃恐其年輕不善哺育年過四十者血氣

就衰乳必不充以及不論年
歲黃瘦有病之婦概不濫收有無翁姑子女

只註冊不准進堂
如子女未及斷乳

者准該乳婦於投充之日報明携帶進堂只乳堂嬰一
口工價減半并察其有無偏愛親生子女以酌去爾

新胎所

產者何年月日

新產子女是否因病不青或別家抱領爲填子
養媳查有實落方准留堂恐其貪利拋棄親生

子女也其出堂例應三年須從分娩之日
扣起不能由進堂之日扣起以滋流弊

詳細查明並驗明面

目純善身無疾病乳漿濃足方准投充

倘以後乳水漸少卽行
更換每僱一婦將堂內

嚴規告其夫男

按名註冊派嬰哺養

乳婦一名派哺二嬰男女
殘疾均由委員董事分派

知悉釋其疑慮

不准擅自擇領每名每月工
錢二千文點心錢二百文

如婦已滿額再有投充者亦記名

在外候缺挨次派補

一乳婦一名哺育二嬰未免多勞鮮逸一切瑣事恐難兼顧當另

僱勤幹僕婦八名

每名每月工
錢六百文

每所一名帮同乳婦照料各事

各乳婦不得以僕婦視之如查有懶惰不作卽行革退至竊取

物件及隱匿作弊情事定當送縣懲治決不寬貸

一胎嬰送堂由

委員董

查明來歷

如姓名籍貫住址年庚嬰父生業或係遺腹嬰母活計若遇好善者

路旁檢送或夜間棄擲門外者無從稽查先於

一籤筒分書百家姓字樣於簽遇此即於

聖母座前設

姓其年庚即於進堂之時作為生年月日至於命名

神前虔卜抽簽為

男嬰以金字為排女嬰以玉字為排臨時委員擬取

有無疾病

如胎紅胎黃急驚慢

驚鵝口油瘋等類

面貌肥瘠能否吮乳

外症易驗內症難憑

以吮乳試之或可畧

知一

二並一切殘廢者詳細註冊派婦領養如兩歲以外已能飯

食以及病重待斃正出天花者概不收留倘於夜間送嬰來堂

者當先於大門旁設一轉桶上繫二鈴

一達董事住所一達門役住房

鈴響該

門役即起驗看收抱速稟董事照收不得遲悞

胎嬰進堂或由鄉間襁負奔馳或係城市路旁檢拾風寒暑濕

感受已深一經入堂先宜去其外感

用葱白三寸豆豉七粒生薑一片煎服或來嬰尙未

落臍者卽用掩臍藥少許洒在臍中四圍用飛過明礬末上蓋棉花油紙再用長裹肚包束堅周俟臍落之後不用礬藥仍用棉花油紙護臍裹肚包束若來堂已落臍之嬰則用棉花油紙裹肚其未落臍十日以前不准乳婦任意揭看洗浴倘當落臍之時嬰兒啼哭可令乳婦於炕上遮風暑揭些須試看若只落一半卽忙用棉花少許墊平俟臍落去仍須裹束切勿透風以損嬰

命

清其胎火

須用人中黃川連各一分蒸服數次

淨其胎垢

每日早晚用熱水一盆代兒盥洗頭

面下部夏日尤宜洗浴倘有遺溺腌臢污穢以致破膚瘡疥等事立即草退

方保平安倘有疾病瘡

瘍痧麻痘疹責成首嫗無分晝夜迅卽報明

委員

董事請醫療治次

車禮錢壹百五十文倘醫無效另行擇請凡遇痧麻痘疹必移住北首偏房以防傳染至種牛痘均不避忌

詳細註

冊如某號某嬰某日某症

配發藥料

藥料於著名藥鋪立摺取用

監視熬成灌服

責成首嫗

入號監視

務令服完甚至天殤責令首嫗無分晝夜迅卽報明請

委員董事下

號驗看曾否報疾醫治委係猝病身死

如有疑竇及貪睡覆壓必提該婦送縣查明分

別德 然後給故具裝殮送埋義塚 用木匣一個將本嬰隨身衣服妥為掩埋其掩埋款式另

列於 後 詳細註銷

一 嬰兒既經送堂即本生父母不准再來看望設有疾病夭殤或經他人領去一概不得與聞

一 是堂另設有施種牛痘局局內延有良醫携種待佈其法嬰兒

滿百日後但無瘡癩癩癩皮濕血熱疳積等症便可引種 多則六顆

少則四顆 種後亦不發熱三四日方出痘矣五六日起如小泡六七

日即灌清漿八九日漿水滿足半月痂落永無後患 乾痂送還本局留為

引種他 其中最要者種後數日務須抱嬰再請良醫視去淨

其毒倘不請看恐留漿未放毒氣不淨日後必生惡瘡痘毒之

患除外來諸嬰隨時施種外凡堂嬰過滿百日未出天花者均
由痘醫生察驗引種若種時或生他疾則另請著名嬰科療治
以便彼此奏功

一 嬰孩二口待哺一婦乳水雖充猶恐不足一歲以內早晚兩次

添哺米湯泡蒸饅半個

共計二兩不准亂攪雜食

週歲以外日添蒸饅四兩

斷乳後

斷乳以兩歲爲限須視嬰兒強壯無疾能飯食者方可斷乳否則應酌量展限

三歲至五歲日

給蒸饅半觔俱責令首嫗分派倘乳僕等婦自行偷食一經查

出定卽革退

一 嬰兒斷乳後先着首嫗撫養

照管衣食也

計首嫗二人可撫六嬰如

年久嬰多撥給衆僕婦分養

每僕婦分養一二嬰如嬰兒過多難以兼顧必隨時添僱僕婦另修

務問斯添僕
婦各養四嬰

誠能視同己用壯實無疾者每月獎賞

按嬰賞錢一百文

倘有凌辱疎忽等情概不給賞並送縣懲儆

一嬰孩薙髮除嚴寒大風及嬰疾之時不薙外春夏秋每月二次

冬令一次應着僕婦抱至前廳輪薙男左女右各留頭髮一撮

以示區別

俱以六歲留頂女嬰以十二歲滿鬻

一嬰兒無論大小有願領男作子僱女作女及爲養媳者俱准至

堂報明姓名籍貫住址生業

委員董事

稽查來歷卽領至

聖母殿

前集齊衆嬰聽其擇領

爲子女者每名出錢二千文如實係貧家抱爲養媳者免其出錢

該嬰

衣褲等物留堂備用當卽註明檔册取其身家清白不致凌虐

販賣字據及鄉保甘結

倘鄉保持索准在城鋪戶代爲出結

卽由堂中給予執照

蓋用清軍廳印

臨時委員親自領取毋得假手書吏

庶日後不得藉口驅逐俾堂

嬰長大不至失所其有紳富官幕願領爲奴婢者除殘廢外則

於 聖母殿前分設男女簽筒書眾嬰排名抽掣給領一體取

結予照

每名出錢三千文與領爲子女者所出之錢均一半倘充補經費備殘疾拜師之用一半給乳婦堂役諸人

有假作子女養媳奴婢貪利掠賣壓良爲賤等事一經查出定

卽送縣嚴行懲究

一男嬰除人願領撫育外其餘養至七歲令進義學讀書

如義學未建卽

就附近蒙館酌送脩資

飯食及書籍紙筆費俱交學師管理

每嬰每月飯食錢一千五

百文書籍紙筆費按季送錢五百文

冬夏衣被由堂送給讀至十三歲除材可上

進堂中按年管顧衣食外

至十六歲成丁後堂中一概不管

各量其材妥爲安

置由堂造冊送縣牌諭紳耆鄉保人等代覓棲身之所或幫人耕牧或爲人服役或從師學習手藝其學手藝者每人給拜師錢一千文不管衣食其餘耕牧服役者衣食錢文俱不管給均於何年月日何人引薦何師

教習詳細註冊並取薦主中保的証甘結三分一分呈鹽道一分呈清軍廳一本堂

存案

一男嬰殘瞎養至十三歲有願領去教習星卜卦算以爲將來倚靠養老者准其報明姓名籍貫住址生業取具本人及族房隣

保甘結給予執照一紙自領之後每月朔望帶同來堂一驗每

驗給錢一百文驗以五個月爲止錢以一千文爲率如有不善教養者斷不給錢

其餘殘疾嬰兒概以養至十三歲卽行出堂或令男女殘暗相配亦可自謀

生計各給謀生錢一千文或撥往養濟院以養餘生

一 女嬰除人願領撫育外其餘養至八歲着首嫗僕婦教其紡績
縫紉至十三歲確訪妥人擇配取具本人身家清白及隣保甘
結三分存案註銷檔冊

一 乳婦俱屬壯年防閑必須嚴密內堂門終日內外扇鎖鑰匙交

委員收執除委員查號驗乳稽查一切之期並收送嬰兒更換

乳婦及要緊事件委員眼同首嫗開鎖事畢卽時封鎖餘時不

准擅開兩旁設立轉桶二個內柵外點凡早晚飯食及內外所
需物件俱擊柵點報明某號由轉桶交遞外堂夫役及內堂各
婦不得在此閒談其交遞之項亦不得遲違錯亂

或每號各設
一牌以爲進

出照驗
更便

一乳婦如有父母翁姑夫男子女並一切親屬來堂探望准門役

回明

委員董事

卽傳點令首嫗帶領該婦在內堂門隔柵會話話畢

卽回

一月只准一次多則門役不准代回

無論男女一概不准進內堂門

一乳婦告假每兩月只准一次

必遇緊要家事方准告假

出堂時責成首嫗搜

查堂中各物不准絲毫攜帶一日不得越二人之數

所乳嬰孩分托同事

二人代爲暫乳

至晚卽歸不准在家住宿來往須親人伴送不准獨行

一乳婦每於乳哺之暇遇事亦當自行動作不得概委僕婦並可

藉縫紉以爲生計如堂中應備嬰兒衣褲襪履等件准其呈請

代成卽由董事核定物料工價若干按件發給倘貪利而悞乳

哺定行革退不貸

一乳婦性情懶惰膜視嬰兒無故打罵或不留心常時跌碰等情立卽革退如栽跌損傷致成殘廢不論有心無心送縣懲治

一乳婦設遇所哺之嬰兩口俱殤查得別無疑竇與本婦無干該

婦向能善視嬰兒而又自願在堂受僱者稟明

委員
董事

酌留堂中

查有乳食不足之嬰着其分哺工價減半其殤一嬰者工價亦減半俟有新收之嬰補額再爲照例全給

一乳婦有病應稟明

委員
董事

請醫療治

每次車禮錢
一百五十文

視病勢之重輕

分別辦理輕者准在堂就醫

藥料堂內
照單取給

重者卽令夫男等領回

將所乳嬰孩派婦代乳速喚官媒婆另僱乳婦接育

一堂中供火食者首嫗二名乳婦五十名僕婦十名廚役火夫各

二名打掃夫買辦各一名共計內外男婦六十八名其餘俱不供給

一堂中每逢春夏之交多燒蒼朮大黃並置貫衆於水缸內以辟濕氣暨瘟疫傳染

一堂門外設茶爐一座堂中內外茶水俱責令火夫經管均用熬茶勿得有缺

每日給湖茶葉半觔

一堂中所置埋葬殤嬰義地現交佃戶承種每年不納租稞以作埋嬰之費並立約存堂包管掩埋掘土五尺封固壘塚繪圖存照有塚之地不准復種

如塚多地少無甚出息當隨時酌予工資

以後挨次葬滿交

地抽約再行另置地畝

一堂中各項簿冊銀錢出入總簿一本委員薪水董事束脩薪水

簿一本夫役人等工食簿一本乳婦工食簿一本首嫗僕婦工

食簿一本

以上各人姓名籍貫住址生業及何人引薦何年月日進堂均於各簿註明

收嬰檔冊一

本乳婦鋪蓋及嬰兒衣服等件簿一本各廳房器具簿一本火

食簿一本各婦功過簿一本日用流水簿一本

一是堂經費均屬官捐出入必須登記分明除營建堂屋置辦器

具義地等項已經用出外

另有清賬

其餘發商生息之項立一總簿

註明某年月日發給某號典商銀若干每月應得利息銀若干按季交給某號錢鋪憑摺支取

由清軍廳總管

每逢朔日

委員董事

查明人數多寡核算用度多少向清軍廳酌量

支取錢文按照條規支用隨時登賬送清軍廳一月一查以期

功歸實濟費不虛糜

一堂內各號住滿後或尙有送嬰來堂查其情狀實難推却抑或

貧夜潛行拋入者應交記名投充乳婦在外寄養

另立一冊登記月日及嬰

孩旋髮箕斗有無悲痕一婦只養一嬰如

現無記名乳婦卽另覓乳足之婦分養其工資月給錢一千

文冬季給嬰兒花布錢二百文

着每屆朔望日抱嬰來堂驗看照數分給俟

堂嬰缺額將寄嬰按冊挨補入堂

寄養乳婦工錢停給

如堂婦有須更換

許該婦等順次進堂頂充

一切悉照衆堂婦辦理

惟寄養若干名口必視

經費羨餘隨時酌定又或寄養之額亦經足數仍有如前送嬰

來堂者則速覓在外願領之婦暫行領乳俟前次寄養之嬰得

補入堂准卽按名接補給以寄養工資

一堂中諸事必求周密而用度浩繁經費實有難敷現雖賴官場捐助粗有規模揆諸遠大之功尙未逮也所冀仁人君子樂善好施陸續來堂捐助所輸若干每屆年終勒石以彰善行俾經費漸得寬裕堂後尙有清軍廳西隙地儘可添蓋房屋並可設立義學施舍棺木等件以推廣此心而完全善舉則是堂爲不朽矣

榮

見治原

作吏管見

育嬰堂乃慈幼善政欲禁溺女此爲要策細思人之溺女原有二種貧窮小戶苦於目前撫養之難不貧之戶慮其日後嫁奩之累遂致忍心溺死收入堂內所僱乳媪非其親生痛癢不關常致疾

疫不能生全且乳婦受僱入堂自己子女不能兼顧若許隨帶親子必不均平周到且乳婦住宿官堂往來出入稽查稍疎嫌疑易起莫如查其實係貧乏小戶生女者按月酌給衣米聽其自己撫養病亡者停給母女天性痛癢相關自多生全在本婦方靠此女月領衣糧自必更加愛惜或一年或兩年即可給人爲養女養媳第一州一縣之內幅幘遼闊似難周遍惟有選擇好善鄉耆廣爲勸諭以佐不逮其給養多寡總以經費而定仍造姓名細冊止須好善首事者數人不時登門查驗面給衣糧有假冒者稟官將本夫責處至不貧之戶原非力不能養須責成鄉保查有能養而撈者量罰銀米給養別女將建堂蓋房備覓乳媪看堂工食一切雜

費均爲節省儘充給養之費凡耳目所及果能實力行之人見其收養實在更樂捐助卽可推廣多養收養有成聽伊父母給人爲養女養媳有等來歷不明暗地送堂之子女則另選附近貧婦之良慈者交其領養給以衣糧不時查驗以防凌虐長成者給以獎賞各省有好善紳士如此舉行者官師其意而推廣行之所以濟育嬰堂之未及而溺女不禁而自止也

葉

鎮

見治原

作吏要言

掩骼埋胔仁政所重近日停棺淺厝所在皆有或溺于風水之說當亟破其疑若果無力營葬亦令立期限責成者約查察押埋至

無主者令該保結報官爲埋葬義塚於教孝之內亦寓錫類之仁
註曰有主有力之棺勒限葬埋有主無力者官量捐費押令
掩埋無主之棺或有寄放閒房寺廟或有淺厝曠野堤岸官
爲遷於義塚簽記以待搬取在城郭者年底巡查一次分別
掩埋在鄉者責成地保報官或委佐雜前往查明押埋有紳
士施棺代理者官爲獎勵地方官平時巡歷所到仍隨時查
問遇人勸戒則暴露者亦自少矣專責鄉保結報仍恐虛應
故事或藉端滋擾

陳宏謀

見保甲書卷三

掩骼會事宜冊

一掩骼會從前遇有窮民身故必令赴官投遞報呈差人查看鄉保回稟往返耽延必至二三日方得備棺領埋死者急不能待每多藁葬今應責令兩城總約及保甲遇有身後無人貧苦不能備辦者告知鄉保查實具報經管官支領棺木并給擡埋人夫工錢四百文星速眼同殮埋仍將死者姓名住址年月日期登明查考毋許稽延如有指勒耽延經管官查出重處

一掩骼會需用棺木應令經管官每年預先動銀製備數十具一半存貯南城一半存貯東城擇寬敞寺廟存貯令兩城總約及保甲經管以備臨期支領經管官仍於年底將動用銀兩製備棺木若干掩埋人數姓名住址逐一造冊申送本司查核

王士俊

見治原

埋齒掩骼

按埋齒掩骼亦王政所先死者不歸尺土猶生者不庇一椽也漢周暢葬洛城棄骸而澍雨降孔融埋四方遺骨而歌頌與皆河東往事也余宦轍所經輒捐俸錢置義塚立明界址繚以土垣凡寄樽遺櫬俱別男女鱗次深埋編列字號姓氏籍貫標立木籤林植塚上另給一冊朗可勘對以便給領毋許收放牛羊種植蔬菜兼視標籤之字畫漫漶者土封之風雨淋蝕者窟穴之狐兔出人者按取地保看守無悞結狀貧民無力營葬俱許附阡所以消疵瘳而贊麻和不無濟云

牧令書卷十六教化

安肅徐棟致初輯

富而後能穀民之道也畜而受以履政之經也既養言教以教全養尙有異義哉

王士俊

見治原

學校

古之教者家有塾黨有庠州有序國有學所謂學校至不一也然國學有司樂司成爲主教事而州閭鄉黨之學則未聞有司職教之任者唯考之周禮地官所載有黨正各掌其黨之政令教治孟月屬民而讀法則以禮屬民州長掌其州之教治政令考其德行

道藝糾其過惡而勸戒之然後知黨正卽一黨之師也州長卽一州之師也以至下之爲比長閭胥上之爲鄉遂大夫莫不皆然蓋皆黨正等兼領之而未嘗另設一官矣後世牧令責重事繁欲其兼司秉鐸之任勢有不能而博士文學等員所司者青衿子弟耳鄉村毗俗不得過而問焉民亦不甚尊禮之非守土君子爲之葺學舍則學舍頽爲之嚴規條則規條廢兼士與民而擦縱焉非牧令之責而誰之責乎

陳宏謀

見保甲書卷三

廣化誨

一州一縣地廣人多官長不能常與民相見遂至官民隔絕若非

告狀到官比糧到官不能見官長一面何從得官長一語平時不知官長禁令如何迨其觸犯按法處治豈非不教而誅甚至聽訟比糧之外仍無一語教訓而曰民不可教豈非不平之論本部院欽承 德意現將地方風俗利弊刊示曉諭各州縣務將示本分發各鄉約社長人等令其轉告附近郵民該州縣每遇因公下鄉路過郵庄傳齊小民將示內條件撮綜大要詢問情形諄切面諭并令轉相告諭回時經過郵庄亦復如此下次經過仍申前諭并問近來情形如何遵從者獎之不率者戒之其有孝弟廉節樂善任郵之人詢得其實或給匾額或當衆稱許或量賞銀米或給帖免差或詳請優獎以示風勵有爲衆所共惡之惡人亦卽傳來嚴

切警戒或每次下鄉經過郵庄俱當如此附近有郵庄不妨迂道
一往不可隨主隨來急遽回署有告狀者如係口角可以當面剖
解如係田土可以乘便往勘果能問明卽爲釋結旣免拖累更彰
勸懲如事涉疑難非當下可辦帶回另批另辦經過庄稼分別勤
惰當面勸戒有應行之井渠水利亦卽隨往相度比糧審事事完
令原被跪齊將本案是非利害以定斷情由曉諭一番以免翻控
以儆將來或推廣泛論指點勸戒切不可急急退堂不肯稍爲存
留惟恐與民親近也凡與紳士相見亦當剴切曉諭隨機勸戒俾
知感發公正立品者以禮延接虛懷相訪其有把持滋事以私干
者自可拒絕向後不復相見可以示好惡之正卽以此廣化導之

益始而官與民相知繼而民與官相信其中大事化小小事化無
良善者有所感動奸惡者亦知畏懼弭患未然之計莫善於此所
謂日計不足歲計有餘者也至於官之行已邪正作事公私有時
可以瞞上官而偏不能以欺愚民百姓經云其下畏而愛之畏愛
在民而可畏可愛者仍在於官惟有言動悉依禮法內外同矢潔
清而其關切境內之民實有一段纏綿愷切之情其下自必有敬
信服從之實此反求諸已又在化誨之先而不僅以色取者也當
與諸君共勉之

手札節要

居官者惟以缺地之美惡定宦途之順逆旣蒞其地遂疾視其民

不以爲民不知恩則以爲民不畏法而民亦從而腹誹之上下交
疾而治道不可問矣夫一門之內尙復頑良不一何況一邑何況
一省正惟人有頑良也故設官以治之官其地者當與其地之人
情苦樂風俗美惡有不容已之情誼有必當盡之職守早夜孜孜
求所以轉移化誨之道戒之用威董之用休善政於是乎出國奢
示儉國儉示禮善教于是不興所謂有不忍之心斯有不忍之政
也動謂民不知恩盍先問已之有恩與否動謂民不奉法盍先問
立法之善與否居常持此以自勉並勵僚屬大率解此者猶不失
爲循良之吏

寄張侍御考書

邊地民愚狃犷尤甚然凡民具有天良恩信所孚自能不勞而理

每見官蒞其地輒先有厭薄之心甚則有嫉惡之意父母斯民之謂何 朝廷設官爲民之謂何果能休養化導有一段實心實力而民頑如故然後責民未晚也 寄儲起綸書

官民雖有尊卑而天良原所同具居官者倚勢作威不以良心相感徒以法術爲籠絡雖可欺於一二人不能欺於千萬人無論內地邊方此心此理均屬相同也 寄崔善元書

法禁于已然教施于未犯就鞫獄中得其致此之由而隨時指點因人化導一時似難見功久之必有移易平時視教字爲迂闊動謂人不可化誨殊不知世間不可化誨者原自有人而可以化誨者畢竟爲多司牧之官平時無一點懼民不善之心又無一句勸

民爲善之語直待犯事從而加刑未刑之先如何不至誤犯既刑之後如何不復再犯均未之計終非弼教之意

寄周人驥書

葉鎮

見治原

作吏要言

留心教化者隨事隨人皆可勸導如審理事件就案內人依傍本案推廣言之凡孝弟忠信禮義廉恥之行俱堪觸發他如下鄉查辦公事於稠人聚觀之地亦復如是勸導計一歲中經吾面諭者不下數千人而此數千人輾轉傳播不下數十萬人相與鼓舞風動是蒞事臨民無處非教化正不專恃朔望講約爲移風易俗之具也

許三禮 見農桑上

答萬言問

甯之人失教久矣祖先父母前多不行叩拜禮雖元旦生辰亦然
卽見神廟祠前俱止一揖而去蒞任來教之每朔望叩拜祖先父
母已背者置主行之先從衙門書役教起使知祖父之尊見親親
之義又不行古講鄉約事小民焉能見 朝廷而知尊蒞任來躬
率紳衿耆庶開講古鄉約先朝拜而後講聽又令各圖製 聖諭
牌每朔望鄉耆伍保照儀開講亦先行朝拜禮俾衆百姓肅然知
敬 朝廷之禮見尊尊之義又甯之士每年兩丁大祭日不到泮
宮執事行禮聞之浙省在在皆然蓋吾黨根本之地如此滅沒從

何知尊師重道之典涖任來與紳衿約每丁先齋宿文廟旁各件
修整今竟士子爭以職事爲榮鄉紳穿朝衣捧香帛依期列班而
拜突見宗廟之美百官之富翻然改觀人人知敬聖尊賢之義又
學宮之中久不行鄉飲酒禮涖任來復此大典申詳公舉行禮歌
詩見 朝廷慎重大賓之典忽然再覩人人知敬老尊長之義又
簿書之冗久不行勸農大典涖任來每逢春月詔各圖父老輪詣
公堂置酒鼓吹勸勉尊 朝廷講 聖諭勸民輸義穀并傳教朔
望各叩拜祖先父母俾處處都知尊君敬親之禮見古民牧與小
民勞勸之義又甯之俗除祈禱雨晴外如日食月食不救護祀土
穀祀山川不成儀涖任後每事講求諭父老曰天地生成之恩如

父母然譬父母有疾痛子則呼天搶地以救之然後子有疾痛則呼父母理當然也食不救護祀不成儀是天地父母恩不知報災不知愁漠不相關之甚一遇水旱輒呼號以禱之情耶理耶爰令必誠必敬闔邑舉行俾人人知敬天災恤民隱之禮見古先王報本反始之義之數者大綱指示早已著之行事其實敬天勤民忠君孝親與夫養老尊賢重農興化種種精義何一不具獨是深者見深淺者見淺誰謂鈍根人講不得上達之道耶

講約十則之一

講約每於觀廟者非但空閑之所便於集衆實欲鬼神法度相維

設教而有司之不法不平亦不可以對神明本縣反躬自訟飲一
滴食一粒盡爾輩脂膏原非取之梓里而謬膺豈弟之任何善可
以甦民借此赴講之期一一進爾輩面教之良爲一快此來視尋
常官民之分不同我卽爾輩師爾輩卽我弟子特命之揖拜習禮
雖短襟露肘一如士子之儀正以士君子之道待爾輩爾輩亦無
以鄉人自待有司扶弱抑強三尺者不貸之刑書試看干名犯義
有不執而懲之者乎衙蠹土豪有不逮而坐贓者乎予少時卽不
欲作州縣誠不能以鞭扑度歲月鞭扑豈快活生涯而我曰爲之
初令東萊卽命一書記專錄刑杖名之曰慎刑錄每夕檢閱惟恐
誤責一夫自受事之日至出邑之日一板不遺竹刑之壞者收付

工房姑以竹刑計蓋在縣計二十月而壞者計八百條至今追思如負芒刺願爾輩息忿止訟若兩造一具卽唐虞之時臯陶爲士亦須鞭作官刑安能爲之曲貸也

程含章

見治原

與所屬牧令書二

孟子有言愛人不親反其仁治人不治反其智禮人不答反其敬旨哉何其言之親切而有味也夫地方官之化民條教號令皆不可缺而要莫備于 聖諭廣訓十六條司牧者誠能與吾民講明而切究之朝漸夕摩其爲裨益豈淺鮮哉雖然非謂發一號施一令朔望講一 上諭而民卽無不化也有其道焉有其心焉清心

寡欲以端其本勤理詞訟以恤其力農田水利以裕其食振興學
校以啟其源敬老慈幼以立其則旌善懲惡以發其機凡所以教
養斯民之道無不盡也而又懃懃懇懇隨時隨地隨人隨事莫不
有以化之暇則親歷鄉村率其紳士耆民講讀 上諭教以孝弟
忠信和睦鄉隣約束子弟之道卹其饑寒問其疾苦此村而然彼
村而亦然一日如是終歲而亦如是凡所以教養斯民之心無不
盡也如是不懈則民宜無有不化者矣尙有不化則是吾化民之
道與心猶有所未盡也反而求之愈盡吾道愈盡吾心本之以誠
持之以久彼民也心非木石安有不從吾教者乎其尙有不從者
乃真頑民也鋤而去之母稍姑息則吾之境內如人之一身血脈

流行呼吸一氣而無有窒礙其間者矣此其道吾嘗得之於堯昔者堯使契爲司徒命之曰勞之來之匡之直之輔之翼之使曰得之又從而振德之夫堯以如天之德又有聖人之契爲之臣而其教民之委曲詳盡猶如此設堯並無如天之德並無聖人之契爲之臣吾知其教民之委曲詳盡尙不止此也唯其有如天之德又有聖人之契爲之臣而其教民之委曲詳盡猶如此此所以成時雍之治而爲萬古立隆之帝王也今諸君能有堯與契萬分之一乎而謂能發一號施一令朔望講一上諭而遂能化民乎又况乎不發一號不施一令朔望並不講一上諭者之比比然也曾不自反動曰民不可化嗚呼豈真民不可化耶其真不知化民者

也

王鳳生

見保甲書卷二

廣教化

民本愚也居官者無以伸其教何以化其愚然必先有以服其心而後可使之率其教非徒事文告科條便可家喻而戶曉也亦非沽名邀譽以權術馭之遂可心悅而誠服也惟痾瘵在抱出以至誠如節民之財省民之力隨時隨事只期吾盡吾心而耳而目之默識潛窺不啻深情若揭偶值旱潦之際暑雨祁寒或未禁屠而先茹素或甫請禱而先宿壇凜然惻然確有休戚相關之意時流露於動作詞色之間雖強悍之俗向藉以持其短長者亦無不感

激涕零變挾制而爲體諫衛歌替祝皆可於無心時證之再於平時敬刷 聖諭廣訓頒發各鄉紳士咸奉一編供於寺院或宗祠公所官爲擇一二貧士操土音而善講解者按月從優捐給薪水每值因公下鄉之便挈以隨往經過村庄先飭地保傳集紳耆詣彼等候官到率同行禮禮畢與之席地而坐令講生立臺上敬謹宣講總期善體俗情使易動聽鄉民必觀者如堵至他鄉亦然蓋人情非其習見則耳目一新輾轉傳聞未必不與人心默有關係雖移風易俗非旦夕可期然偶有勸募等事與他邑同舉而此則一呼皆應咸樂趨承彼則不信弗從羣相推諉難易懸殊卽其明

驗

王植

見治原

教法

三代而下無教法屬之教者設義學宜

上諭而已然卽宜

上

諭一事而實力推行之亦必有效余嘗演

上諭通俗解以俗言

敷衍廣訓之文令講生以土音宣諭聽者頗知領略新甯尹王君嵩每次自講一條反復開導余以口音不對不能爲也初至約所令八九十老民得坐于紳士之後一體吃茶但不許稟公事講約時令平民立聽講畢後從容片時問地方利弊問貧民能力田養親者能讓產者能恤寡嫂孤姪者四五代同居者力建家廟義田宅者修建前賢祠宇者皆置籍記其名並註舉報者之名以備確

核問年逾九旬安分無爭孀守逾二十年事親撫孤教子者近者
召見或給匾語歲一頒旌以榮之問社中閉戶讀書髫年苦學屢
試優等者爲誰修橋梁道路周恤里黨者爲誰皆籍之問有建社
倉立義學者爲定規條立教法若案犯中不孝不義邪教惑民者
唆訟者行竊者賭者淫者亦置一籍于約所一體令其跪聽俟三
年之內實能改悔社內有保任者方與除籍近約處所有淫祠廢
廟令呈明改爲義學如私建庵院迎神賽會打醮施僧者卽上
諭中所謂異端也杖其人毀其所建之淫祠所存之經箱以示民
知所趨向皆推廣訓之意實在施行之法也余所經行處聞讀書
聲輒入少坐觀其子弟視其所讀何書指示之遠出宿寺廟中住

持或請拈香諭之曰不必此非吾拈香處也在新會時值城隍廟會循例行香見甬路兩傍坐若干人人皆詭形怪狀裝神仙以惑人者余令鞭之曰如果神仙不騰雲上必隱形去矣此等皆何爲者令衙役盡驅逐遠去亦推行廣訓之義

嚴如煜

見保甲書卷三

三省邊防備覽策略

川陝邊徼土著之民十無一二湖廣客籍約有五分廣東安徽江西各省約有三四分五方雜處無族姓之聯綴無禮教之防維呼朋招類動稱盟兄姻婭之外別有乾親往來住宿內外無分奸拐之事無日不有人理旣滅事變所以頻仍也康熙年間川陝總督

鄂海招募客民於各邊邑開荒種山邑多設有招徠館又飭州縣
選報紳士耆民充爲鄉長約正宣講 聖諭城中朔望山內場集
均爲演講責成地方官實力奉行風俗丕變盜賊稀少百年以來
父老傳爲盛事善政之化民成俗卽邊徼亦未必不可舉行是所
望於志希循良者

葉世倬

見保甲書卷二

律例須知弁言

律例卷帙綦繁勢難盡喻於民而百姓囿於見聞之陋錮於習染
之汙有明犯爰書而習焉不察者殊堪憫惻茲於律例中擇其地
方易犯各條略加註釋并以律載服制條目附列於後於宣講

聖諭後并講一二十條使愚民動色相戒又令紳耆家購一編暇日爲子弟講說庶知遵守不復誤羅法網則黠化潛移藉以保其身家或不無小補云

謹按順治十二年奏准各問刑衙門止有律書一部小民不得與聞故犯法者衆令督撫將刑律有關於民者摘而錄之有司於春秋暇日爲之講說並令學官常爲士子講習載在

禮部則例

袁守定

見治原

圖民錄

州縣設義學薦科舉舉節孝行鄉飲下車入學講書朔望宣講

聖諭泛泛行之幾同故事苟出以至誠緯以精思恪恭震動以爲之自有風動之意舊制須作意行之

敬老所以使民興孝也吾敬其父彼焉得不以孝事父乎故不特來見者當以禮接之有百年者就其家見之可也敬士所以使民興行也吾敬其爲士民焉得不以是爲趨而勉爲士行乎故不特來見者當以禮接之有賢而隱者就其家見之可也人情敬其父則子悅敬其兄則弟悅敬一人則千萬人悅居是方而使一方之人無不悅令聞廣譽豈不休哉然而操之者至約也夫亦曰敬而已矣敬老敬士之效

鄭袤守濟陰下車旌表孝悌敬禮賢職王希呂所治郡敬禮文學

端方之士程迥所歷縣隱德潛善必表而出之以勵風俗凡蒞一方詢其有學有行好善樂施之士及孝子節婦志其里居歲一存問每因事過其里卽招其人并節婦之子而慰勞之係士耆與之抗禮其家有應試者高其名次歲時祭祀每遺以胙作其氣使之有異於衆人亦闡揚風教之一端也

優禮學行節孝之人

汪輝祖

見保甲書卷三

教民

教民之要不外勸懲二端如朔望行香宣講 聖諭勸農課士鄉飲賓興尊禮師儒採訪節孝之類皆勸懲之灼然者近多目爲具文余初蒞甯遠時方孟夏示日勸農皆訝異數至鄉飲酒禮吏莫

詳其儀注不揣迂腐一切典禮次第行之三四年中耳目一新頽
惰革面士奮科名婦知貞節用力無多收效甚鉅夫通都大邑猶
曰公務殷繁不遑兼顧若簡僻之區何致夙夜鞅掌而亦一概廢
弛乎故典關勸懲者不可不舉

潘杓燦

見政畧

未信編

保庶之法唯有教養二端衣食足而後禮義興故教不先養飽煖
無教近於禽獸更爲聖人之所深憂但小民散居村落爲上者何
能以孝悌之道家諭戶曉且鄉民樸魯見官師如帝天卽有開導
必不相入故莫如以本鄉之長老教本鄉後生爲便易此講約一

節斷宜吃緊勿以爲迂遠也至于鄉建社學以教童子實本古制
今多不行宜卽以講所爲課蒙之地以約長兼塾師之職能設法
膳之使小子有造亦父母之所當然也

講約

鄉飲古養老之事也達尊有三雖爵者亦得與飲而此禮專尙齒
德例於冬杪行之有大賓有介賓大賓與邑長抗禮介賓襄贊其
間稍次于大賓要皆居于客位其敦請之法各處儀注不同而席
費頗出正項務須延訪輿情悅服者當之其有紳衿公舉書吏以
蜚語毀舉者不可輕信蓋一當此飲卽有匾揚幣聘之榮素封者
固樂趣以誇于田夫野老而巨狡宿奸亦冀借此以庇畢世之愆
行賄者每賂口以行不試之譽而蓄怨者亦乘隙以施嫉賢之誹

至有村落痴騃之人累有積貯里地欲施魚肉蔓延舉報蓋愚民見邑長如天如帝登公堂如雲如霧一聞此言反如驅臨陷阱百計求脫奸蠹捱身打點或覓情或指官分肥烹潤竟有破家者是

非尊賢乃厲民也其于立飲之意不大刺謬乎雖是一節依樣葫蘆故事然小民有口多關官箴衆好衆惡必加覺察

鄉飲

報節孝無有定期或奉 旨舉報或上司採風或地方公舉凡有真節真孝有關風化者自當潔志表揚不獨俯協輿情亦且有光治化若要部撫人告立祠建坊者須查定例詳請若止請部撫給匾存案表章者於例稍有上下亦屬無礙至于自行給匾光耀本人門閭者不必拘例竟可行之要必先憑親族公呈取具地方結

狀申詳者據呈加看申請職行者據呈加獎批給此事衙役需索最多地方漁潤不少故富者多過情之譽而窮孝窮節艱于上聞務須察訪真確爲妙

舉報節孝

朱

見治原

作吏管見

地方節烈孝義之事年例已合者自應請旌未合年例者州縣官須有一番維持保護之道平日留心採訪某村有節孝義士某人巡歷經過不妨親加存問并傳集本村本家之人當面曉諭念其情之可憫獎其事之難能相勸親族留心扶持照看不可圖產欺凌年例未符官先給一匾額以待旌表貧窮者酌給米布以示優

恤許其合例卽爲請旌鄉民見官重節義人自知節義之當重本人益堅其志地方有逼孀欺孤奪產之事告官立卽查究不少寬貸亦不可延累逼孀搶嫁之徒有所畏懼所全節義不少

葉

鎮

見治原

作吏要言

忠賢遺跡年久沉沒于荒烟蔓草者亟爲搜尋考核復其故址而表章之揚前哲卽以勵後人舉節一事貧族或慮上下衙門胥吏需費竟有遲疑不卽呈報者須出示曉諭並留心訪實飭速舉報或畧爲經理不至沒潛德之幽光且使人知節義之足重

王士俊

見治原

勸戒

孝子義士節婦烈女民之標準也雍正二年奉 上諭直省建忠

義孝弟祠及節孝祠男女異域樹之緯楔識其姓氏以樹儀型固

移風易俗磨世礪鈍之 大典矣守土之司近多忽畧偶有申請

落落無幾兼之力能上達多係富饒之家而窮鄉僻壤孤苦伶仃

無表彰之藉卽爲採訪所不及偶有奇節彪炳勢難遏抑則胥吏

需索酒食之資舟車筆黑之費貧家反爲苦累竟視旌獎若畏途

余官楚粵及河東兩省俱檄行搜羅一應苛索務必嚴禁發潛德

之幽光震聳聵之耳目庶以恭體 朝庭激濁揚清之志也夫

漢書食貨志云春將出民里胥坐于右塾隣長坐于左塾卽今鄉

約遺制也今鄉約之設朔望宣講 聖諭一十六條 廣訓萬言

雍正四年立族正以察族之賢不肖雍正七年復於大鄉大村設約正一人值月三四人置德業可勸者爲一籍過失宜規者爲一籍於此鄉內有善者衆推之有過者值月糾之每月約正詢實狀值月填簿籍歲終考核其善過彙冊報牧令設爲勸勉其詳如此余曩任粵藩因思記過之籍第可爲鄉村守分農民偶有過犯而設若夫大奸大慝曾爲探囊拏篋之徒月朔不來聽講約正無可糾繩特立木榜勸懲之法以愧勵之按律載凡府州縣各里俱設立申明亭置板刻榜文於內將奸盜詐僞不孝不弟與一應爲惡之人並書姓名於亭能改過自新者則去之有私毀亭舍塗抹姓

名者罪如律令杖一百流三千里余之設立木榜遵國典也風化攸關安得不詳明而申諭之

民禮

王制司徒修六禮以節民性所謂冠婚喪祭鄉相見也今貴賤踰制貧富相耀莫如婚喪二事考古之昏禮周官媒氏云入幣純帛無過五兩儀禮婚禮云皮帛必可制禮記昏義云婦執笄棗栗服修以見不過如是而已今則女索男以厚聘男期女以盛奩篋篋之費動踰中人之產猶云未慊又昏禮不賀而今則賀者喧闐昏禮不用樂而今則樂連數部殊可怪矣至喪爲大事子路云不若禮不足而哀有餘也乃古者桐棺以殮今則玉衣珠璧矣古者奠

用素器今則雕篋刻俎矣古者弔尙生芻今則山珍海錯矣古者
邱隴俱小今則旁置萬家矣古者喪必廢樂今則金鼓沓奏矣旣
糜費夫金錢又顯背夫古制風俗之弊俱由士大夫權輿奢僭豔
彼觀瞻旣而富厚之室效之旣而空單之家亦效之竭膏疲血悅
耳玩目竟忘昏禮爲著代之悲喪禮有但化之慮若曰不如是不
足以避姍笑也豈不愚哉

蔡世遠曰婚喪賓祭酌古今之宜因其人情風土制爲簡易
之禮以通之斯善則也

朱 見治原

作吏管見

一州一縣之內四鄉風俗有美有惡美者不知其善而勸勉之惡者不知其非而懲戒之卽有知其非者以爲風俗如斯粹難更改置之無論願膺民社者到任後留心採訪何者爲美何者爲惡得其的確臚列示民使士民皆知勸戒每見紳士婉切言之紳士素有官諭自先踴躍遵行善者推廣力行惡者漸次汰除愚民有所效法漸次移易但不宜遽繩以法更不可差查滋擾開需索嚇詐之端

作吏要言註

官司文告原不可少要在設身處地入情入理人人易曉自然人人喜看傳述既多自有感化最忌者地方官以此告示塗飾耳目

自作身分或希圖上司往來觀聽或自己本有抱歉之事以此塞人口實或幕友賣弄筆頭盈篇累幅全無爲民真意此等掛壁空文徧處皆是誰人肯看誰人耐看卽看去亦徒滋訾議耳

王有孚

見用人

一得偶談

條教號令原是勉人爲善戒人爲不善不是老生常談今之文檄告示若將禮法二字說得透徹人雖至愚未有不觸目知儆者惟僮浮游敷衍不能說到人心坎裏去所以視爲具文

汪輝祖

見保甲書卷三

告諭

吏役鄉民均無遠識凡差遣聽斷不將所以然之故詳細諭知必且愾于遵率吏役則周折貽誤鄉民則含混滋疑均足累治故告下之語必須詳細

熊宏備

見治原

居官格言

善改廸人心者當因其所明而漸通之毋強開其所閉善移易風俗者當因其所易而漸反之毋輕矯其所難

袁守定

見治原

圖民錄

爲治以教爲本祇隨人隨事隨時隨地諄諄教誨民自感化所謂

善政不如善教之得民也

以教爲本

凡地方有敝俗革之須有道德事敲扑文告無益也周舉爲并州刺史太原舊俗以介子推焚骸有龍忌之禁一月寒食莫敢州爨老小不堪歲多死者舉到州作弔書置子推之廟言盛冬去火殘損人命非賢者意應惠示愚民以還溫食賈彪爲親息長民貧多不舉子時城南有盜劫人者北有婦人殺子者彪出案驗掾吏欲引南彪曰寇害人此猶常有母子相殘逆天違地遂北行按致其罪數年間人養子以千數曰此賈父所生也辛公義爲岷州刺史俗畏病一人有病合家避之病者多死公義欲變其俗分遣官人巡檢部內凡有病者皆輿置廳事暑月疫時病人或至數百廳廊

悉滿公義設座其間理事所得秩俸盡用施藥迎醫療治之躬視
飲食于是悉以差召其親戚諭之曰死生由命不關相染前汝棄
之所以死耳諸病家子孫慚謝自此始相慈愛三事乃移風易俗
最善者 革敬俗須有道

凡俗好鬼神之事以其能禍福人驟禁之民恐召災而訛言起矣
西門豹治鄴處置河伯婦大是快人偶聞後漢書宋均爲九江守
所屬浚遘縣祠唐后二山衆巫取民女爲公姬有妨嫁娶前後守
令莫敢禁均命今後爲山娶者皆娶巫家女勿擾良民其害遂絕
較之西門豹投巫之事不惡而嚴變移惡俗若行所無事真善術
也 變易惡俗

田文鏡 見用人

嚴禁迎神賽會以正風俗事

照得異端邪教最易煽惑人心鄉愚男婦聚處混雜不但敗壞風俗抑且陰作匪爲若不嚴加禁戢日久釀成禍患誠非細故然聚衆必有其由而入教必有其漸揆厥根源皆自迎神賽會而起蓋小民每於秋收無事之時以及春二三月共爲神會挨戶斂錢或繫搭高臺演唱囉戲或裝扮故事鼓樂迎神引誘附近男女招集遠方匪類初則假托三皇釋門清茶等名色以鼓惑愚民經旬浹月聚而不散遂成黨羽因而焚香設誓布散謠言此卽邪教之所由起也欲杜邪教先嚴神會嗣後男耕女織各務本業毋得聽信

奸棍騙誘佯修善事甘入邪教除民間秋冬祈年報賽凡在應祭神祇許報知鄉地赴地方官具稟批准止許日間演戲祭告不得繼之以夜亦不得過三日如敢裝扮神像鳴鑼擊鼓迎神賽會者地方官不時嚴查犯則立鞫解轅照巫師邪術例分別首從從重治罪婦女有犯罪坐夫男鄉保地隣知而不舉一并連坐

黃可潤

見保甲書卷三

禁做俗

直隸喪禮居喪者有負罪哀痛之容遇親友則稽顙頰近古而南府人又有大可異者鄉俗重女凡父母喪棺槨衣衾厚薄必請命於女女不論家之有無欲爲者子不得辭至殯而用浮屠演戲跪

解惟女之故母喪凡母所遺女皆有之男不得問母黨之伯叔兄弟及女眷要素服帛闕喪妻喪子媳亦然遭喪者不違卽位哭講解禮法而痛懲之不但厚風俗且保民之身家焉

直隸順天天津保定三府之外婚聚尙從省儉中人之家儀幣十餘金而已女家奩不過布素視南方奢靡不同然南府有二十六弊女必長于男或十餘歲或七八歲五六歲故婦持門戶壓制夫男代訴官長者比比余稔知其弊一日集諸生月課二十餘人問之最下室人長三歲兩歲耳其乖異如此古禮男三十而娶女二十而嫁今聞女二十而男則僅十三四不但夭折可虞亦非正家之道余見直隸兩府之民每村瞽目甚多未必不由此是不可不

大聲疾呼以禁止之者也

勸戒

北方土厚水深故其民性質厚朴而無佻巧之習其詐也亦愚而易辨抗糧舞弊起滅訟端聚衆械鬪堪輿迷惑諸弊比南方差少而有害于民之身家者賭也盜也私宰也其有害于民之風俗者居喪演戲也同姓爲婚也女流跑解也男女進香宿廟也北省皆然不獨直隸示告之外于講約及大集場下鄉相驗人衆擁觀之時將敝俗詳悉勸諭民自漸知其非其最難變者賭博耳有窩之于家者有誘之於集場者唯設法稽察以嚴懲之可以威治不能以德化也

王植 見治原

做俗

生財有道曰生之者衆食之者寡而今則生之者少耗之者多矣
禮俗之繁衣食之侈所不待言而最爲民蠹者四一曰賭賭之例
禁綦嚴矣今則有曰壓寶者處處爲之市肆之中廟會之際公然
搭棚賃屋地保衙役嚙其陋規不但明知不問抑且與爲朋夥雖
三尺童子有錢一二文亦可一壓而取之視擲骰抹牌其害更甚
然責成于諸役犯則先懲人知畏法自可禁絕一曰娼無恥婦女
市侑賣姦浮浪子弟尋死入局卽有土棍包攬名曰掌竿甚則娼
賭合爲一事名曰花賭矜士中亦有以此牟利不以爲恥者然亦

無不可禁前邯鄲尹王君光燮出示嚴諭有娼婦犯禁者杖而官
賈之秤劬整賣視猪肉價卽逃之隣邑余縣吳公國棟於土娼分
別驅逐外查其家有所畜幼女俱押令轉賣或歸宗此等事如認
真爲之人敢以身試法耶一曰廟會循舊會期焚香拜神禮亦可
行行商坐賈各攜貨物人所必用聚于一所亦可勿問若婦女擁
擠糾人進駕紛紛若狂恬不知怪一廟所耗費數月衣食之資前
余縣署事孫公爾周遇走馬賣解婦女卽拘責夫男將馬入官交
後任不知者頗疑之知之者以爲風俗民生計也余在新會日見
會頭人等擡城隍神像沿門募化嘗有施至十餘金者金鼓導從
名曰出巡示諭之曰聰明正直之謂神幽明一理也神何樂乎托

鉢行乞有倡首者罪之乃不敢動一日演戲春祈秋報偶一爲之亦所勿論而地保棍徒動輒歛錢城市闐闐之區喧聒時聞有不願者強派惡取不知財物竭于優倡子弟易于浮蕩賭博剪竊乘機而起余在新會每公事稍暇卽聞鑼鼓喧闐問知城外河下日有戲船卽出示嚴禁拘拏會首究處有謂爲不順民情者勿之恤也久之有以戲錢修橋道者余出示獎許此風遂衰戲船亦去以上四弊一到任卽當示禁而終始實力行之使人民知所重在此至于棍徒糾黨盟爲兄弟恃強欺弱動輒打架多係悍民習爲強梗所宜明示重處又不待言

陸世儀

見保甲書卷三

求才

治天下以求才爲先治一邑亦當以求才爲急今之郡縣非無才也而有司不知作興鼓舞之道其留意人才者不過季考月課爲文字相知耳夫文字之責上有督學下有學師何煩有司更爲數數也愚謂有司季考月課當另爲一法分理學經濟二科設爲條問理學如顏子所好何學之類經濟則舉時務之切要者每科數條觀其所答優劣德行優者養之庠序經濟優者措之施行不惟賢才可以立得而聞風興起者吾知且不可勝計矣

黃可潤

見保甲書卷三

教士

教民總要明理義理義明則凡事皆有聖賢準則其天質清明者
可勉焉與古爲徒其下焉者亦恐得罪名教而不敢蕩軼直隸制
府高公藩憲方公嘗刻小學及近思錄註解明晰頒行屬邑又動
項赴南方購買 御纂四經每邑發數十部余購買 欽定四書
文百部諸生有力者令繳原價其次或數人同售寒士則發學借
給之然難在有人講解耳北方學者多朴魯却肯認真余在無極
每月二次聚諸生課文得其秀者三十餘人每課畢問以所讀經
書異同或有劄記來請質者講論彼此皆有益其中學古有獲十
餘人類分處四鄉余凡遇邑諸生皆諭令將應讀經書質于隣鄉
某某之通達者自是頗有傳授蓋人多豈能皆與講習但盡心于

秀者耳濡目染義理漸明旁推交通彌廣而流于永久不獨文風
日上也

王植

見治原

紳士

十室之邑必有忠信况今之牧令比古侯國乎一邑中有學行老
成之紳士有能文勤學之俊髦有詩詞古作之軼才有閉戶潛修
之端人皆邑長所宜禮接也除鴟張浮薄不自立品者無庸議外
皆當處心物色以時接對昔陳公奕禧爲吾邑宰擇士子秀者與
紳衿子弟爲詩文會從容竟日陳公雅琛于義學延名師生童課
藝常手自丹鉛甲乙之皆文教善政也余在岡州日子五經中各

摘八題考其論說記序考辨諸體不限日期不必全作余亦偶擬一篇商之諸賢遂有岡州錄課之刻紳士來見者無不卽時延入言不及私語必盡情因得以訪問賢能因事接見亦政教之一助也至若停徵封印時五簋便酌延有學有行之士畧分言情亦常事耳每見州縣請客非送規禮之大商卽饋節儀之富室貧紳下士漠如也余有延請必先紳士卽其人每出意外余笑曰吾輩本一體相與談地方利病問士習民風不在盃酒間也若不立品者法亦不可廢余在陽江比較一生充里長赴卯期余喝令責之將受笞余曰生自賤非余苛也雖然吾不以一二人失待士體嗣後無復爾也後在香山衿士抗糧赴比者頗多且諭之不悛余忿其

頑鈍無恥竟管之然每以爲悔至于童試尤須認真余是日恐有
傳遞點名後令搜檢執事人等盡出惟留兩門子伺候將封門門
子稟曰人已出去矣余曰爾非人耶亦令盡出而後封門出題蓋
傳遞不離黥役所取非人真才淹抑不得不嚴也

汪輝祖

見保甲書卷三

治士子干訟

士而干訟必不可縱然遽懲以法又非育才之道甯遠士習澆漓
好以干訟爲事余至與諸生約 國家優待衿士雖已事許用抱
告如事非切已或爲隣佑或爲干證護符袒訟者點名之後概不
問供給予紙筆令在堂右席地作文隣證中自有白丁在審係白

丁左袒則與白丁並列之衿士卽以白丁之罪罪之立會教官當堂扑責白丁非左袒者衿士亦不復取供而以所作之文年終彙送學使職員監生則先責後詳必不姑恕自有此約竟無紳士試法者終四年未扑一衿故知衿士原多知禮不當與訟師同日而語蓋士不自愛乃好干訟官能愛之未有不知媿奮者愛之之道先在導之於學爲月課爲季考拔其尤者收之書院義學之中鼓舞之振興之隆以禮貌優以獎賞與干訟者榮辱迥殊則士以對簿爲恥莫不砥厲廉隅不獨文教之可以日盛也

往者陳公滄州守江甯始至卽諭諸生有行誼修飭而進見以求益者吾與爲賓主禮其毀廉隅證爭訟者檄諸縣簿載

其名歲終報府俟督學按試時上之終公之任諸生無證訟者右見望谿集亦治士干訟之一法

王鳳生

見保甲書卷二

紳士

爲政不得罪於巨室交以道接以禮固不可以權勢相加卽士爲齊民之首 朝廷法紀不能盡喻於民惟士與民親易於取信如有讀書敦品之士正賴其轉相勸戒俾官之教化得行自當愛之重之偶值公事晉見察其誠篤自重者不妨以其鄉之有無盜賊民居作何生業風俗是否淳漓博採周諮以廣聞見至於觀風獎勵書院膏火鄉試賓興或捐資以厚贈遺或籌款以增產業務期

培養寒峻文運日興若干謁以私卽推而遠之無論矜紳必不容其袖遞稟呈關說詞訟倘敢非分滋事藐視官長甚以呈詞詆毀當衆謾言一經嘗試必加意整飭明正其非決不可任其得意揚眉以啟他日加凌之漸最無狀者輕則戒飭重則詳革必鋤非種以育真才斯足服士心而崇衆望

何耿繩

見政畧

紳士

紳士爲一方領袖官之毀譽多以若輩爲轉移採其行端望重者偶一俯交便覺正氣隆重人知嚮方再爲觀風月課整飭斯文則衆口成碑宵小之徒氣類蕭索自陰消無數事端

葉鎮

見治原

作吏要言

課士是第一要政或每月或每季分別生童親視之正其文體示之以所應讀之書體驗之法并講明忠孝廉節之義士風未有不駸駸日變者士風變則民風亦變矣

端士習厚民風莫先正其蒙養而蒙養之要端在小學一書經傳義蘊廣大一時難通小學易解且切于日用凡蒙館中令擇能明小學者爲之師初讀書時卽兼授此俾熟讀而講明之人家子弟無論士農工商幼時莫不送入學舍三五年間其工夫儘可及此乘其天性未漓以此先入之言浸灌於中庶乎有基勿壞日後爲

士則易成好秀才爲農則易成好百姓習俗安得不厚況此亦不難立法考察姑以中縣論約計城鄉蒙館不過二百上下查明立冊印官無暇遍歷教官亦可分任其責如此庶爲師者先要講明此書理解爲父兄者知此書之必當讀亦要先擇蒙師久之將不待官長考核而成爲風教矣

此可以通義學之
窮但不必造冊滋
擾

註曰責成蒙師首授小學士農工商皆曾讀小學之人于風教人材實有裨益其考察之法莫如將一州一縣之內毋論成童蒙館查造一冊下鄉經過不妨到館先與館師講究訓讀之方示以學徒應讀之書下次經過復至館查問獎勸不獨知館師學問教法學徒內有資性可以上進者亦可物色

或賞以書籍加意培植在州縣官止須用些心思不惜迂道之勞久之四鄉之學皆官學鄉館學徒皆官學之徒師生更加奮勉比之特設義學苦無經費招人肄業不能徧及者不啻事半功倍其館師仍聽各館自相延請不必官爲指定或優者加以獎勵不妥者偶以易之總不必分委教官又滋一番去取營求伺候攪擾也

陳宏謀

見保甲書卷三

通查義學租田館舍檄

滇南越在遐荒夷多漢少土田磽瘠居民窮苦多有俊秀子弟苦於無力延師又夷俗不事詩書罔知禮法亟當誘掖獎勸俾其向

學親師薰陶漸染以化其鄙野強悍之習是義學之設文教所關
風俗所係在滇省尤爲緊要也歷任各大憲留心文教加意風俗
各屬仰承德意建學死師所在多有但查各屬從前義學或止爲
成材而設而童蒙小子未能廣行教讀或止設在城中便於附近
漢人子弟而鄉村夷獮未能多設義師夫蒙養爲聖功之始則教
小子尤急於教成人與學爲變俗之方則教夷人尤切於教漢戶
今欲使成人小子漢人夷人不以家貧而廢學不以地僻而無師
到處絃誦衣冠文物耳濡目染夷變爲漢非多設義學不可除會
城書院本司議將奉發帑金置產以垂永久業蒙兩憲准行外所
有各屬義學合行通查仰該官吏即便轉行所屬州縣各將本地

方有無義學或訓成材生童或訓夷獮幼童或幾處或在城在鄉
係何時何官建設其中有無公田租息講堂書舍若干間現在聘
何人爲師年需束修若干來學生童若干文課每月幾次夷童若
十有無助給餼廩膏火并將各該地方附鄉應設義學幾處其教
習夷童應用何等人爲師年需束修若干一併妥議詳報至尙未
設立之州縣及止設立在城一處而四鄉適中之地尙須增設者
該地方官悉心籌畫設法妥議詳請舉行或倡義捐設或將地方
何項陋規作爲義學之用如無項可動亦將應設之處所需若干
具詳請示卽從前已有義學而日久頽廢或田租被人侵隱或因
近日地方有事廢弛未開者亦卽確查據實具詳以憑核奪

義學規條四則

一館師宜慎也成材之學取法宜上經館之師選擇宜嚴地方官留心採訪無論本地舉貢生員及外來紳士必須立品端方學有根柢者延之爲師至於城鄉蒙館卽於本地附近生員儒士內慎選誠樸自好不與外事者地方官不時稽查勤惰并令教官按期協查如能克端師範實心訓課該州縣優其禮貌時加獎勵如虛糜修脯惰於督課者查明另延倘有不安本分於設學之村寨唆訟生事愚弄夷民者是不得義學之益反滋漢奸之擾立即另行延請仍將所犯查審詳究以示懲戒每歲開館以正月爲期散館以十二月爲期至歲底散館將某館生徒若

于成材若干幼童若干註明漢人夷人申報查考不得遲開早散有名無實虛糜館穀

一化誨宜廣也成材之士務在敦勉實學習誦佳文不可仍踵陋習專工浮靡並令館師將存心立品居家治事之道隨事指點切加勸戒至於蒙童則課讀而外必訓以拜跪坐立之禮儀君親節孝之大義每逢朔望館師率領各徒以次序立拜謁至聖次拜館師次令各徒交相拜揖館師於該地方敬將 聖諭廣訓明白講解令各學徒環立聽講并許該耆老民人齊集聽講所發 上諭及各書均交館師遞相交代毋使遺失

一學徒宜分別遞升以示鼓勵也在城義學成材爲多在鄉義學

蒙童爲多然亦有蒙童而儘可造就漸至成材者是不可不遞加甄別如蒙館義學內有資性聰穎勤於課業可以學文者卽升之在城經館此等遠來就學薪水維艱該地方官量給膏火以示獎勵卽城中蒙館童子能曉經書學爲文字者亦卽升之成材經館如經館中有成材生員文筆可造而人材又復可觀者仍許遵奉憲檄量給盤費給文送至省城候兩憲考取送入書院讀書如此層遞進取猶是古者由鄉而國之意而鄉僻生徒各知奮志觀光將來於此中提拔數人轉相傳授士習文風均有裨益至村寨蒙館夷獠子弟鮮通官語不識漢字其始必以讀書爲苦是在地方官加意引誘設法獎勵並令館師用心

開導俾先通漢音漸識漢字并卽訓以習禮明義不得以夷獮而忽之更不得以夷獮而拒之也如有土目頭人阻撓不許向學者立卽究處

一田租宜歸官經理以杜私隱也從前學田州縣並不管理或教官經手或館師自收易致盤踞漸多侵隱今撥給各館田地有一處而分給數館者有數處而同給一館者零星分收完欠更難查察嗣後均應歸地方官經收分給館師不許館師私收不許胥役分肥或租田附近學館地方官卽令老成鄉約人等催令租戶眼同就近上納並將納過數目報明地方官查考如有拖欠立卽追比倘秋成尙遠館師不能枵腹課讀地方官量行

捐墊取領存案於秋收時還項并將此田地租息另給佃戶執照於照內填明田畝坐落坵數租斗數目取具佃戶租約如佃戶逞刁抗欠追照另行招佃將來新舊官交代一併另造清冊交代可也

栗毓美

見保甲書卷三

義學條規

一勸捐宜聽民便也捐立義學原爲無力延師之子弟而設而窮鄉僻壤尤宜加意多立一學卽培植多少子弟事聽民便則人心樂從或一家捐一學或數家公捐一學或一村立一學或數村公立一學館舍不必擇地修金不拘成數大以成大小以成

小各就地方情形變通辦理童子艱於遠涉其本村富戶公捐者卽在本村立學雖東修無多較之每保每社設一大學者更爲妥便且義學設在本村則捐輸之家得沾實惠民間聞風向義有不觀感興起者乎

一擇師宜慎也義學之設所以正蒙養而廣教化延請塾師須於歲前十一月責令紳士首事公同舉報再由地方官查考分別准駁果其品端學粹則從遊者自衆今擬定修金四十兩爲大學三十兩並二十五兩爲中學二十兩十數兩爲小學大學生徒以二十五名爲率中學以二十名爲率小學以十五名爲率卽以學生之多寡定塾師之優劣並以經書之生熟察課讀之

勤惰若大學不及二十各中學不及十五各小學不及十各者非塾師不能認真課讀卽品行不滿人望許該董事隨時查明禮辭另延以免曠功而收實效

一延師宜定章程也各鄉義學必須首事議定塾師稟縣批准後再行訂延其開館日期均於開印前後擇吉入學十二月初間散館修金按月支送非過事苛刻也緣塾師不無更易一經透支則修脯旣虧學將中廢固不得不從長計議定以限制而薦食乾俸尤爲近時積弊必當嚴行禁止不至有名無實

一義學宜隨時稽查也每歲春間開學之始先將各義學學生姓名年歲並所讀何書造具清冊至秋間再造冊一次比較春間

生徒有無增減學業有無長進並可以察塾師之勤惰其冊令首事開造交該管地保進城之便投縣備查在城義學由儒學造冊移縣以備查核該地方官仍於因公下鄉之時隨時稽查分別獎勵

一應隨時宣講 聖諭也查各州縣向於朔望宣講 聖諭不過在 cities 關廂而窮鄉僻壤未能週知四鄉既立義學自應責成紳士率同約正副鄉地保在於該處村集每逢朔望日請塾師敬謹宣講省城現刻有 聖諭廣訓 聖諭講解刷印多本分散各義學其生徒中通曉文義者授讀廣訓若初學能識字者塾師將講解一書不時宣講該地方官仍於因公下鄉之便卽

塾抽查生徒功課如有能講解 聖諭大意及背誦成熟者
卽從重獎賞其塾師訓課有方亦量加獎勵且省中刻有呂新
吾先生小兒語好人歌闡戒宗約歌四種每學發給一部俾師
徒隨時講習如目前尋常道理卽是身心性命之學於人心風
俗方有神益

一學舍宜隨時修建也立學之始總以籌備經費爲先務迨經費
旣足卽當籌辦學舍每當歲晚務閑之時勸令從學之家或出
人工或捐物料衆擎易舉集事無難但求堅固不可徒飾觀瞻
是在隨時勤導因地制宜以圖經久

一經費宜嚴禁侵蝕也凡捐輸銀兩或交商生息或置產納租但

責令公正紳士自爲經理一面造報立案以備查核不得假手胥吏以杜侵吞挪移之弊至於生息之項該管州縣發給銀兩取具該商領結仍發給該商印照並明白曉諭如後任有捉用挪借者許該商持諭告阻若該商私允挪借卽責令該商着賠仍通詳 各憲以垂永久

一寒士宜存恤也義學生徒多係寒家子弟其間材堪造就者正不乏人地方官隨時查考如有天資穎異勵志芸窗堪以進取卽當格外周恤並送入書院肄業俾得有所觀摩仍不時親加考課庶成材不至廢棄既可仰副 國家化民成俗之意而振拔寒畯未始非興賢育才之一端也父母斯民者其勿忽

倪

玠

雲南昆明人嘉慶己巳進士道光初年官陝西洋縣知縣餘未詳

義學條款四則之一

各鄉子弟豈能個個望以功名要認得立學之意是要他識字是要他明理知道父母是要孝順的尊長是要敬重的隣里鄉黨是要和睦的架是打不得的狀是告不得的姦盜邪淫是犯不得的賭博酗酒等事是犯不得的每日將此好話教訓一番子弟聽慣便不覺把氣質都變化了

徐文弼

見持家

考試點名除弊法

昔歲予在陳復齋湖南學使幕中因考試點名虞多擁擠如衡州

府屬之衡陽未分兩縣時應考童生多至四千餘臨期齊集嘗于四鼓開點已刻方畢雖多方諄諭究難轉移再四籌畫惟有廩保領進之一法以之歷試數棚行之甚便陳公因命擬奏稿將於科試事竣奏請定行旋以丁憂未果其法以童生縣試之日例由廩生畫結保送一生所保數名及數十名不等今卽令于縣試事畢案送府試之時不必依取錄名次造冊但將廩生逐名開列每名後載所保童生各姓府考畢取錄案各冊送院試之時如前院試時卽按冊上廩保名次先期牌示第一名廩保某逐名挨列俾各廩生知孰先孰後臨時先點進第一名廩保則所保童生隨之魚貫而入點畢卽令退出隨點進次各廩保其所保童生仍前隨入

或有越次擁擠者責及廩生如此則諸童依廩保爲後先廩保視各次爲遲速諸童無虞失點自不越次求先且于未入應點之時廩保之所在而諸童隨之卽可加之約束亦復便于稽查蓋廩保之設原以杜冒頂鎗手之弊向來所保各童照試案各次編牌聽點一廩生所保前後散列于點各之時廩生齊集侍立兩旁自開點以至點畢必逐牌記憶所保之名應接不暇勢難細辨故聞有頂替鎗手乘機混入及至發覺歸責廩生每以不及細認爲辭此法行則此輩無乘間混入之虞而廩保杜藉端委卸之弊諸童免奔趨追逐之苦而老生省竚立守候之勞誠一舉而四便也